

40340215

42

部二八

昭平縣誌
卷八



昭平縣志卷八

藝文部



詩以言志歌以永言卽文藝可以規器識自古然也若夫嘯傲山川感懷時事藉以紀興衰覈人物則華衮斧鉞寓其中矣茲採舊志詩文之與本邑有關係者登之簡冊附以後人名作先之以詩歌次之以文記俾觀風問俗者得所攷察焉編者識

詩歌

宋別元光

鄒浩

不因言事抵昭平爭得相逢一笑親塵裏豈知居士隱山中聊見宰官身周顒尚以妻爲累元亮惟知酒是真莫逆於心更何語撥開船子遇膠津

昭平縣志

卷八

藝文部 詩歌

壹

廣州市西關洪壽直街大明承印

陸焯曰此詩柯志首錄而楊志刪之不知何意可發一嘆

宿龍門堡

龍大有

六月勞行役歸帆憩晚風雲來山頂黑日落樹腰紅五服周圖廣羣方禹跡同兩崖千仞削中險一流通點點邊城析悠悠長樂鐘遐荒明主念萬里遠臣蹤我欲抽常劍憑虛問太空

錄柯公原志

龍門驛

徐問

險仄灘江峽龍門驛路通軍塵沙水上春色瘴烟中深樹埋豺虎窮荒絕雁鴻天山勛亦壯吾欲掛彫弓

昭平道中

簽事 潘恩

舟移桂嶺外人泊暮江濱百粵炎蒸地千山荒豹羣虛明涵洞月狼藉散溪雲何處征歌發愁予不可聞

初度日龍門舟中

潘恩

萬里逢今日，啣盃思不禁。孤蓬荒徼月，雙鬢逝川心。拔劍濤俱落，

看山鳥獨吟。夜來鄉夢斷，一嘯水烟深。錄柯公原志

自柳至平樂書所見

簽事 袁 表

昭平灘險惡最猛，是龍頭藥弩。弦齊鼓銅刀，鞘屢抽紅巾。翻把隘

白晝競鈎舟，倘得山韓將。狐羣豈足憂。

府江舟中

副使 方宏靜

乙葉捲湘簾，相看殊未厭。弦揮白鳥起，景慢碧雲添。境昔華夷恨，
官今吏隱兼。榜人無太駛，為數衆峯尖。

龍灣

傅惟宗

石窟藏靈自古聞，碧波無底浸江濱。水枯忽漲二三尺，歲熟加收

昭平縣志

卷八

藝文部 詩歌

式

廣州市西關洪壽直街大明承印

四五分神物，蜿蜒盤地軸。靈光剌焰動，天文太平有象。今全見白
日晴虛五色雲。

昭潭

藩司 林應亮

乍艤昭平棹，言登鎮粵臺。軍聲諸部肅，詔諭百蠻來。建節清烟霧，
屯營闢草萊。戰船依野泊，關鎖遇晨開。水岸千家引，山城萬角哀。
按圖多廢壘，覽勝有荒苔。擐甲驚衰病，紆籌媿淺才。諸生尊俎上，
今日效涓埃。

官兵渡水擊猺賊被溺

舉人 通判 廖 肅 本邑人

重發龍驤不逗遛，整居烏合敢為仇。材官暗渡誠長策，銳士先登
亦壯猷。但使投鞭曾擊楫，何堪破釜更沉舟。可憐四十驍雄魄，枉
喪江魚赴急流。

哭張備戎懋功救下孟陣亡

廖 肅

衆方縮首獨捐軀報國孤忠孰與俱長羨書生先料敵每疑驍將
肯前驅死綏尙足驚狂寇生氣居然媿懦夫回憶崑崙關將令時
懷勇畧發長吁

廣運謠堡

藩司管大勳

廣運接龍洲營屯跨上流編茅環作屋列木卽爲舟城郭依高塹
豺狼遁遠陬年來平十寨無復九層樓

上下四屯越縣出治

廖 肅

銅柱高標瘴癘銷柳營赤幟尙飄搖徒戎策獻非迂濶逐客書投
倍寂寥衛笑史魚甘骨鯁漢嫌汲黯寢藩驕杖藜嘆世誠狂悖杞
國何人天可嘲

昭平縣志

卷八

藝文部 詩歌

卷

廣州市西關洪壽直街大明承印

直道難容焉往投潛夫著論淚先流虞絃未解當時愠蜀魄空啼
故國愁知我春秋猶按劍毀誰詞賦莫登樓腐儒到此何須較三
徑歸來得自由

頌閔父母達

廖 肅

龐統原非百里才那堪藤薛困蒿萊牛刀暫試逢盤錯鵬翮初翔
惜折摧劍戟縱橫勞撫字羽書旁午費區裁牧民禦寇誠難事保
土全城亦壯哉

懷林兵憲廷陞師南

廖 肅

弭節昭江控上游威嚴懋著更風流文章教化時加意武備儲胥
自熟籌鈴閣憶施羊祐戟龍門空望李膺舟於今明月盈湖水謾
自忘機伴白鷗

頌冷父母茂松鼎建學宮

廖 肅

明公建學安先師數仞宮牆異舊時雲漢昭回稱制作風雲變化
仰威儀鄉賢今日應難擬名宦他年更屬誰卽此便遺千載愛何
須擇地建新祠

漢家青史紀循良又見仁侯撫字詳萬姓謳歌依召杜一腔慈愛
比龔黃寧爲瑞鳳光天德特沛甘霖濟僻方自愧蛩吟揚莫盡佇
看天府錫金章

三門灘

周 滿

細雨龍池海樹昏歸艎乘浪薄三門朱旂影亂紅雲上雪劍寒衝
白日屯山鳥喜人鳴過榻洞桃笑客艷當尊江邊石壁高千尺好
勒中丞破賊勳

昭平縣志

卷八

藝文部 詩歌

肆

廣州市西關洪壽直街大明承印

府江歌

解元唐世堯平樂人

叱羊山向府江隈三角舟橫鐵撞回龍口浪平千尺險猪牙波靜
兩崖開

雷霹藤灣壘石橫分流檢窖怒濤爭喜連穴口平如砥疏鑿甯須
遜五丁

永灘磯下浪灘來奔馬衝堤勢已摧天遣金鷄飛渤海人憑畫鷁
洗尊壘

福登無復石磷磷三老長年笑語頻月下纔撐上仰濶雨中又渡
繁洲春

舊道龍門森漫齊俄看驅石走虹霓陽侯怒息歸溟渤神禹功高
勒會稽

端午登迎恩樓

邑侯蕭啓賢當塗人

樓閣新城隱畫屏公餘閒倚望江溟天連芳草啣杯綠山吐晴嵐
落案青競渡有龍飛急浦省耕無雉馴長町同憐萍水天涯客把
酒何須我獨醒

江樓對酒正天明花鳥無情歲月更旅鬢已從青鏡改鄉心偏向
白雲生憂時冲峒終爲祟抱病參苓浪作羹回首蛾眉標勝事肯
將五斗戀邊城錄柯公原志

和端午登迎恩樓

教諭梁國柱南海人

百尺樓成接翠屏開櫺誰共俯重溟雲飛絕壁還凝紫天湧長江
故漾青蒲泛旅情隨土俗花遮河畔及畦町百壺况有如泉酒相
對休論醉與醒

昭平縣志

卷八

藝文部 詩歌

伍

廣州市西關洪壽直街大明承印

仙郎本自號神明遠眺翻驚事變更知是勞心紆國計獨煩援手
拯民生荃香正賴堪爲宰蓴菜何須憶作羹吳咏楚騷俱遘日絃
歌今已滿江城錄柯公原志

畫舫初成試棹

邑侯柯壽愷蒲田人

濟人須識濟川功平渡人間波浪中春水驟添三尺漲布帆無礙
一天空譚邊玉屑當杯落醉袖桃花夾岸紅坐上僊凡漸自隔錯
教指點此舟同

無題

邑侯甘文奎南昌人

十里湖光移小舟漫尋春事及西疇江鷗無意憑他去野老多情
爲我留薄暮早春含夜雨九峯晴色散溪流吾儕到處皆行樂何
必蘭亭說舊遊

又無題

落花流水認天臺半醉閒吟獨自來惆悵仙翁何處去一枝紅杏滿庭開

陸焯曰無題詩二首得自昭甦錄首頁中蓋昭甦錄原係甘公文奎所輯尾頁有擬建文塔留囑後人數行乃甘公親筆首頁有此二詩並無題目而筆跡與尾頁相似其爲甘公之作無疑味其詩意飄然有塵外之致未必爲昭平而作然詩以人傳卽一字亦珍於拱壁余不忍沒之也

遊聚仙巖

邑侯陳定國沙河人

冷然古洞足幽居乳滴仙巖澤有餘竟日何緣辭案牘觀風不碍侶樵漁清溪絕響腸堪洗翠嶂環空眼自舒最是斯民懷樂土願

昭平縣志

卷八

藝文部 詩歌

陸

廣州市西關洪壽直街大明承印

聽擊壤太平墟

天然窟

陳定國

天然靈窟毓鴻濛渾似雕裁粉飾工置册陳書迹俗吏脫衣掛幘擬仙翁坐來五月寒生骨話到三山樂在衷更愛石巢當戶結不須蠟屐探旁通

留別昭平金明府

贈君陸 陸錢塘人

行旌返自五羊城慚愧神君倒屣迎昔日六橋攀柳別今朝滿縣看花明故人叨下陳蕃榻循吏應標卓茂名指日恩光來冀北去思何以慰昭平

陸焯曰此詩載先高祖贈中翰公粵遊集中但不知金明府爲何人今觀職官志乃金公碩鼎浙江人康熙六年曾令於此急

爲探入固喜金公之循卓不終埋沒而更幸先人之手澤亦曾留于此地也

穿巖

贈君林廷幹 本邑人

十年吾道未曾南暫向傳經在此岩如可劈山開手段直扶天柱一肩擔

經三烈祠

袁景星

孤舟旅櫬苦零丁兇盜何堪夜入艖萬里一心歸未得千年三烈節彌馨廟經亂後遺基在塚到春回芳草青彷彿貞魂何處是長浮灘水伴湘靈

馬峽碁盤石

袁景星

馬峽水深深不測兩崖千仞臨江側崖頭誰是碁盤石碁子擺列

昭平縣志

卷八

藝文部 詩歌

柒

廣州市西關洪壽直街大明承印

如相奕俗言仙去碁常留風雨千年局不休崖頭樹木風颼颼往來行人等蜉蝣世間棋變古今愁天荒地老幾千秋嗚呼天荒地老幾千秋江花江月空悠悠

聚仙巖

潘超

石室烟含境最幽此間原是聚仙樓籀文百代凌崖古碧乳千年滴水流綠葉新紅天欲霧涼風微冷景初秋簾前尚有蒼苔字石洞何年跨鶴遊

潮水庵

舉人廖世德 本邑人
知縣

層巖絕壁白天開彷彿蓬萊至妙哉法界洞中高萬丈丹崖頂上列三台幽閑仙鶴乘雲至清靜潭龍湧浪來坐待波瀾潮水起及時洽好應風雷

蚌山

副榜 潘遇 本邑人

何年此蚌鎖江濱川嶽鍾靈遠俗塵鏡水樓臺侵海市指天甲冑
儼龍鱗苔封璀璨藏珠焰溪繞金波吐玉唇不逐漁人遭鷓啄清
操常立四時春

三烈祠

拔貢 李回春 本邑人
知縣

東西相望水中流訪古尋幽到一邱三尺土埋香骨在千年祠見
烈魂留殘碑日落蒼苔暮野逕風悲碧樹秋舉目頻看沖洞處我
懷重抱杞人憂

弔烈婦王唐氏

石濤

唐氏王家妾輕身殉火奇痛夫腸已斷報主志難移焦額憑誰問
灰心只自知將相隨冥路不忍死生離一死尋常事王家妾最奇

昭平縣志

卷八

藝文部 詩歌

捌

廣州市西關洪壽直街大明承印

愴惶情轉切慷慨志無移烈質隨烟化芳名薄海知從茲同穴志
終古不相離

前題

羅僖

詩禮何嘗廢頹風久不知如何蓬華婦能使古今移義切綱常重
心安天地知捨身全殉火非是為分離風火最無情媽花抹地平
綱常千古重節烈一身輕紅粉和烟散丹心向日明年年江上草
先傍墓邊生

聚仙巖追步陳父師韻

拔貢 林之梧 本邑人
教諭

閑常着屐覓仙居踏凳攀蘿興有餘松竹巖前巢鳳鶴烟波江上
隱樵漁石溪水繞山皆聚洞口簾垂影自舒岩裏雖空神物在文
光常射斗牛墟

重到西坪

詹如錫

才得三旬兩出鄉無些冤抑累官忙崎嶇峻嶺高峯險屈曲危灘
野水長一望嵐烟如露障四圍青草鼓歌狂要荒何處觀民族費
盡心思治不良

頌馬父母尹二律

林之梧

鳧鳥雙飛遠俗埃神仙天上下凡來舟崖松柏凌霜茂庾嶺梅花
冒雪開此日士民登壽域昭州風景似蓬萊愧無籠鶴丹誠放願
獻南山壽一杯

慈父神君善政奢無知草木盡生芽風清粵國三江水雨潤昭陽
一縣花襦袴幾曾衣十室劍牛今已耨千家瞻依孔邇興歌遍介
壽稱觴進紫霞

昭平縣志

卷八

藝文部 詩歌

玖

廣州市西關洪壽直街大明承印

贈勞秀才兆昌

邑侯馬 尹 常熟人

昭城佳氣鬱葱葱間世英賢毓秀鍾家學淵源標赤幟筆峰天矯
若游龍敲詩花下香生玉揮塵鐫前舌帶風大器每成多在晚純
儒指日直登庸

頌錢父母兆澧開接米嶺

林之梧

嶂道橫雲峻荒榛壓徑陰崎嶇灣百折嶮巖兀千尋崎路嗟行邁
危途畏陟臨陽春回黍谷明月照松林刊木修荒遠隨山闢壑深
薰風披茂草甘雨潤幽禽砥矢歌新調崖頭頌好音當年神禹跡
不朽到如今

頌錢父母兆澧開接米嶺

歲貢 黎中和 本邑人 訓導

三里連雲路千年疊障鄉天教高突兀誰辦熱心腸歲月經營久

晨昏動鑿良五丁施巧力八斗布文章澤遍牛蹄潤風披馬頸涼
謳歌多不盡思議總難量石勒仁慈遠常存姓字香恩膏今已渥
明德世傳揚

碁盤石

邑侯何毅夫順德人

仙人最是難方物爛柯山中傳七日巴邛霜老橘朱殷其中曾不
減商山今古悠悠棋一局一輸一贏皆縛束仙人遊戲以出之勝
負無心神自足昭江馬灘灘下流天工斲石成文楸雲樹蒼茫容
坐隱臨湍清泚卽金溝古仙會奕曾於此遺下枰間未斂子千年
歷劫無窮期眼看世上須臾耳我聞青龍九部王積薪溪居孤姥
爲鋪陳東五西九南十二願乞一枰服世人服盡世人終後着聖
賢不貴爭強弱螳螂怒臂枉當車雄如劉項成一劇細看此局未
昭平縣志卷八藝文部詩歌拾
曾終豈無敵手分雌雄萬物相爭不相下率之此物還太空不如
得已且姑已盤中相對留餘技神仙仍不盡所長應知天下當如
是

聚仙巖

古峻

幽岩浪說有名仙詞客登臨覺迥然次第奇花沿澗上參差古木
列峰前紅塵歲月如流水勝地乾坤不記年此與桃源多不異古
來應有避秦賢

和林先生廷幹穿岩原韻

吳繩祖

夙傳道學冠南天佳句而今鐫石巖五斗不圖君相澤一經留與
子孫擔

文明峽

舉人林作楫本邑人

不減環滁勝甯文襟帶間川分雙岸斷峯鎖一溪灣瀾水深千尺
濠梁扼兩山里門無閉處峻嶺自相關

帶龍樓

林作楫

檐臨翠蓋戶通幽烟火家家四畔謳閣下行人殘月曉崖邊石出
海門秋虹侵棧道波千尺路遠江城帶一樓從此山靈龍變化黃
姚文物冠南洲

帶龍樓

舉人潘芝成 本邑人

橋帶神龍入翠樓無邊風景動人謳山牽紫氣和雲轉水蘸晴光
漾日浮喜得太平稱盛世欲將雅調襯清幽興朝萬國恩波蕩瓦
蔭高時亦有秋

天然橋

古知君

昭平縣志

卷八

藝文部 詩歌

壹壹

廣州市西關洪壽直街大明承印

小澗天然跨玉腰鎔成雙鞏傍黃姚河分水面平鋪石樓就崖間
暗渡潮非是秦皇鞭力作無關魯匠慧心雕迥然郊外超凡砌勝
蓋揚州第一橋

和林先生廷幹穿岩韻

古知達

傳經樂道向南天化雨春風滿一岩信是鴻文興六代起衰還賴
有公擔

聞馬灘聲

增生蕭聲舉 本邑人

迢迢灘水匯龍平馬峽灘高忽有聲怒咤不因春浪激呼號常爲
火星鳴音傳兩岸人寒栗響徹三坊市震驚寄語蓬居修戒備從
來此兆不虛生

登迎恩樓遠眺

邑侯陸 焯 仁和人

龍平佳氣望中收，最爾孤城百尺樓。雲護山容簾外立，月翻波影檻前流。不關飲興登高好，却爲民情眺遠周。赤子依依思保障，慚非老吏學誠求。

步陸父師登迎恩樓韻

歲貢 古文修 本邑人

烟光四望不勝收，宰政優閒獨上樓。雲樹莫遮詩思潤，江泉翻逐錦心流。公門桃李三春富，文學絃歌遍道周。想是割鷄懷莞爾，龍平游刃又何求。

步陸父師登迎恩樓韻

廩生 何元輝 本邑人

一望平田黍盡收，閒來頻上鎮城樓。山迎文筆雲中現，水遶甘棠檻外流。仰賴經營欣借寇，過承先霽已如周。懸知治譜傳先世，政洽人和不用求。

昭平縣志

卷八

藝文部 詩歌

壹式

廣州市西關洪壽直街大明承印

贈古壽翁碧時年九十有一

陸焯

人間上壽世間仙，碩德由來享大年。花甲一週還過半，華封三祝已居全。當時鄉飲從公論，異日恩榮待後賢。更喜諸孫好頭角，森森玉樹滿堦前。

陸焯曰：壽翁年九十一矣，世居邑城，精神矍鑠如四五十歲人，可謂昇平人瑞。而博聞強記，不第自有知識以來八十餘年親見之事，能歷歷言之。卽此建縣以來，故老傳聞亦能纖悉記憶。但頤養冲和，不出戶廷者幾廿載，余竭誠晉謁，再四諏咨，修志之役獲益良多。故人物一門都在論定之年，而獨以壽翁殿焉。此亦公道在人心也。

送陸父師

林作楫

一縣花方笑歡呼父母臨風清船片石書奏字千金葭屋嫌來暮
驪歌唱別音一年殊不借悵役此棠陰

恭頌陸父師德政兼以志別（聯句）

才德賢侯到此遊古碧

如何福曜照他州潘文成

政平自覺朽楊少廖當毅

花美還憑話誠周姚崇賢

兩袖清風繩祖武邱維祖

一天甘雨慰民愁林作楫

南池書院培桃李古文修

泮壁新波咏棫樛黎士超

買穀不勞編戶累關琪

均徭盡絕蠹胥求黃觀禮

清釐祀產崇先德葉開運

整飭祠堂敬古侯麥逢春

訓士不辭吾舌敝蕭聲舉

愛民惟恐此心浮吳潤譜

代庖三月恩光溥楊文標

秉筆千秋惠澤留何元輝

昭平縣志

卷八

藝文部 詩歌

壹叁

廣州市西關洪壽直街大明承印

借寇無緣民命薄李世和

依劉何自我心憂馮文顯

他年名宦憑公論翟尙本

此日生祠非合謀廖樞德

萬姓每愁棠蔭遠龍瑛

三千應有湛恩流吳橙

迎恩莫負名樓意鄧瑤

日日迎公上此樓黎祥錫

文明閣五古並序

邑侯張秉銓

乙丑歲暮春余來黃姚催科由紳士李公秉紳梁公廣信勞公錫

疇錫龐二昆仲林公上清古公之愚紹德二昆仲飲余於文明閣

閣在山巔風景絕勝時巡檢徐公遇春亦在座聊作五古一篇以

酌其情工拙非所計也卽求諸公郢政 策策凌冬風送我上雲

表下視俯塵寰倏忽如一鳥脚踏霄漢低眼裂峯巒小怪石聳層

巖奇木雜寒篠一水何縈迴環抱青山遶上有最高頂洞壑深而

窈獨立碧雲間飛樓何縹緲居人指對山雙箭插天杪我視象不
符命名殊未曉獨愛入山門誰題句矯矯秋高山更清雋句知者
少摩崖讀新書令我雙目瞭山靈若相迎幽思寄綿邈座有鄉之
人談及烽烟擾有地成石田無人不餓殍室廬擄一空賊復縱原
燎此閣獨宛然完璧仍歸趙言之慘可憐聽者色應慙勸君且莫
哀太平今已兆請看茲山高梢雲魁其嶮禾稼占登場魴鱖浮在
沼天道有循環何用勞心悄世界等滄桑彭殤齊壽夭對酒我且
歌開懷超浩渺臨風一長嘯餘音尙裊裊顧此城北公再盡壺中
醪歌罷興未闌下山月出瞰回頭望天邊數峰青未了

昭平縣志

卷八

藝文部 詩歌

壹肆

廣州市西關洪壽直街大明承印

文記

府江善後議

總督郭應聘

一日改設土司夫欲弭盜源先據要害今荔浦之峰門南源修仁
之麗壁市永安之古眉寨各巡檢司皆久沒於賊宜悉革罷易爲
土司一移東岸營於水滢募兵二千人分屯平嶺仙家冲諸田一
移兩岸營於仙廻高天龍頭磯募兵二千人分屯六內六障馬尾
黃牛諸田一移上峒營于古西募兵千六百人分屯峯門大喃諸
田一移下峒兼轄西岸營于東綫募兵千人分屯大宅東瓦諸田
仍復廣運足灘以重巡緝至土司則于兵領中擇有才勇者充之
俾其世守有不効者更之二日更設參將夫空要害置土司分兵
屯守不有將領以統之何以整齊約束重示彈壓乎昭平舊有坐

鎮指揮一人第事權稍輕遷代靡一宜改設參將兼制桂平凡兩岸三峒諸土司盡以屬之以之練兵簡卒戢夷防奸其有獷悍不逞者得相幾鷗勦不爲遙制三日開通水陸向者諸獠占據道路榛莽令蕩平之後宜開山通道拓闢險阻西自昭平明源村峒以達仙廻古蘇永安自藤灣達馬尾象磯達田冲龍頭磯抵府治東岸自昭平里步以達平西水滸羅山及十三屯自羅山舊途達府治而又于沿江開緯道以便舟挽募商伐木以恣採取俾鼠潛蟻附者無所容而風景亦因以漸闢四日酌處兵費三峒兩岸設官營堡屯卒幾七千人鹽米之需人月給三錢屯種建築諸費不與焉初年計二萬有奇梧鎮司府之藏調節而均給之次年墾田所出足以自養卽止勿給五日豫定縣治府江距蒼梧五百里許中昭平縣志

卷八

藝文部 文記

壹伍

廣州市西關洪壽直街大明承印

間山谷窈查林菁蔽虧片影孤帆行同異域稽之故牒唐宋昔設龍平思勤馬江等數縣後胥爲蠻占沒今昭平卽龍平地也江之西澗廣衍寬平風氣攸聚宜卽其地創一縣治以平樂之昭平馬江二里富川之二五都賀縣之招賢鄉上下半里割而益之總其賦得三千六百有奇而仙廻諸田稅盡以屬之六日處分田糧兩岸三峒諸區覈賦遺田計四十萬畝有奇舊屬平樂荔浦永安者令民復業輸獠賦如故各土司屯糧者人給四十畝兵領加給有差授田之初養以月糧資以牛種三年之後計畝科種三升免其獠差永著爲例

平府江記

失名

府江上接灘水下達蒼梧爲廣右咽喉綿亘五百餘里兩岸諸獠

獐依憑險阻時時出沒東岸連富川賀縣而北抵恭城西岸連修仁荔浦而南抵永安東則有上中下古折及桂冲石峒黃坭嶺葛家峒諸巢西則有大小黃牛大小桐江及磅碌象磯馬尾冲蓮花汀等巢而朦朧仙廻高天水滄二峒與五指白帽諸巢皆爲羽翼江介諸嶺之間深菁蒙翳白晝嘯聚猿升蛇伏一遇餘皇鈞而掠之急灘之間幾爲鬪黷屈其最者連藤峽倚溪峒縱橫郡邑明成化初都御史韓雍征藤峽先破修仁荔浦以剪羽翼共斬獲七千有奇雍旋師賊復蜂聚都御史朱英下令撫之立山獠李公著等遣子投款乞復縣治爲編氓時參議謝綬在行間議依山立城以其地爲永安州陽朔隣邑諸峒亦以次就撫矣弘正間賊首韋萬等圍永安州流劫府江指揮張敞爲其所害都御史閔珪陳金後

昭平縣志

卷八

藝文部 文記

壹陸

廣州市西關洪壽南街大明承印

先興師討平其黨嘉靖以來賊復煽亂賀縣黃峒巢倪仲亮鄧良朝等聚衆剽掠僭稱名號都御史張岳集兵破之黨羽悉平隆慶初荔浦永安之間反者四起都御史譚綸檄總兵俞大猷畫進剿計諸所籌畫甚悉會綸被召而大猷亦奉檄東征事遂寢逾年三峒賊攻荔浦縣城破古架村兵民被戮者無算西斫仙廻諸賊圍永安州復要執知州掠其印要厚贖始得出當是時道途梗塞城門晝閉永安修荔幾至陸沉隆慶初古田師興議者謂府江患與古田等宜乘兵威並及之都御史殷正茂是其議迨師旋則春深水漲兵不可舉而彪灘龍頭磯諸賊益肆傷人掠貨不可枚舉事聞兵備副使陳其樂坐貶官是秋正茂遷總督以方伯郭應聘代巡撫正茂與應聘決計討之乃檄漢土官兵六萬以六年十月水

陸分道而進三峒兵克古西巖口赤魚靛諸巢西岸水兵克太平古田馬尾彪灘仙廻諸巢東岸兵克黃峒古冒水漣河冲諸巢賊大敗追及南源鷄籠山復破之凡擒斬首從五千一百有奇俘獲四千餘名口萬曆元年乃議城昭平設縣治復添設參將開通水陸諸道把總齊凱領田一萬三千三百八十畝有奇下峒屬之士舍覃文舉領田八千六百六十畝有奇東岸屬之士族岑仁領田一萬五千二百畝有奇西岸龍頭磯諸兵領田五千一百九十畝有奇仙廻諸兵領田八千二百六十畝有奇永安高天古帶諸兵領田二千二百畝有奇各畫地分界設堡戍守是年冬陽朔碎江賊廖金濫等起南源殘孽復陰助之襲古西巖口據峯門山灣應聘發兵援之千戶張世勳衝鋒手刃三賊被創死各兵斬首二

昭平縣志

卷八

藝文部 文記

叢書

廣州市西關洪壽直街大明承印

千餘顆奪復峯門應聘復檄參將王瑞統兵合擊之遂破山灣勦南源賊首周公龍等願自縛詣降移莫模兵於山灣分屯諸田據永安扼塞守之復遣總目覃滿等破榕峒諸巢卽以滿領其田上中峒獐目楊九昌等相率投降輸糧編戶府江悉平

平昭平山寇碑

少師馬萬 恭

百粵遠在西徼深山大澤封豕長蛇獷然憑藉天子震怒命大中丞吳公曰女其擊戮蛇豕夷勦山澤布我王化唯女功吳公受命不半禩遂謀于總督司馬凌公檄府江兵備徐副使曰定百粵必先定昭平爲我調兵募向武諸州漢土官草薙之以還報天子乃會師於李總帥錫命下四屯哨都司輔文啓以偏師十一月克白壁諸巢十二月又克白馬板燕諸巢五年六月克六勒諸巢斬首

四百餘級俘賊屬牛馬器械稱是又命上四屯哨參將吳京以偏師十一月攻福村茅花大梁五指大克之十二月取鐵釘岩水穿諸巖黃竹二岩捧岩大峒岩白馬岩遂入五指三岩正月穴地入五指老巢斬首六百級俘賊屬牛馬器械稱是餘賊悉奔潰四沸有司土漢兵浮斬有差露布至聖心嘉悅大中丞晉秩一級賜金幣餘並加陞賞司馬氏曰余聞百粵有五指白帽蓋天險云正德中數攻五指不克嘉靖中攻白帽亡功乃吳公五月而舉之若破竹嗚呼深山大澤非真蛇豕也若奮焉改圖令田里相安妻子相保萬世無天誅無血大中丞之刃豈不愉快若自作不靖是魚遊釜也則天誅故在大中丞之刃故在

昭平縣志

卷八

藝文部 文記

壹捌

廣州市西關洪壽直街大明承印

府江開路記

藩司管大勳

粵有府江在灘江下合濛荔水折而南蓋全省咽喉也其流入金峽趨巴江出叢林兩岸巖壑疊嶂連雲茂林密菁怪石危壑人迹罕通諸蠻每每從冲口或蒙陰中出邀商旅戕吏民歲歲爲患雖經誅剿屯兵列堡迄未有剪荆伐翳鑿山通道爲千百年計者萬曆十三年春正月王師平府江維時督府連江吳公撫臺龍溪吳公相與籌曰剿判匪艱而永靖之爲艱府江幾用兵矣而旋蠢動患在巖險弗剷鬱堦乎乃合謀于直指黃公上書闕下若曰府江萬嶼凌空千嶂蔽日循崖徑窮度壑溪阻棄爲盜區迨今剿定善後之策曷若開路稱便上報曰可是於檄憲副歸安韓公總董其事召平樂尹黎來王經紀之經始于歲乙卯夏五月竣事於明年

丙戌三月自小倉板歷龍頭磯廣運堡足灘雷霹至銅盤冲總二
百餘里西岸內田冲營出沿江冲口佛槽猪巷大銅江營一至江
口一自龍塘抵清潭腦小銅壳營一至小銅江一至田冲界一至
塘峒仙廻一至象磯堡丹竹冲界一至大小銅壳銅江一至浪南
峒一至大水冲一自黃村後出佛槽歸化等處平峒堡一接三妹
巢一至榕峒及潘村東岸賀縣自信都至龐冲懷集界一自沙片
山至蒼梧界一自縣至東安界各若干里而松林鼓羅二峽尤稱
險絕則命李芳劉拭率江潯接地脉合力疏通以接西岸之道無
病涉焉總之設公館二亭鋪四十渡舟十三橋梁六百二十五是
役治地資兵伐蒙資商架構資財畚鍤資石賞費資羨而借公帑
僅六千餘官不費而績用成嗟乎余於是仰窺三院之謀謨宏遠
一勞而永靖之爲快乎不庶幾乎與草昧開拓並稱休烈也哉

府江修路碑文

參政馮時可

府江自海陽而來分流爲灘繚繞桂林合濛荔諸水以出蒼梧下
番禺驚濤急湍若鬪霆激矢趨走數百里於一瞬息舟一不戒與
石鏟相觸則糜潰無蹤其逆遡而上輒用數十人牽絙力輓淹辰
更朔而始達不幸而扼陽侯塋魚腹者往往而有緣江兩岸羣山
戢戢或鵬褭龜突或踞齒戟鈎錯峙于翳莽叢棘中人跡杳絕鬱
爲封齒雄虺累議開道率不能五達陸達比於康莊遐邇竊以爲
病歲癸巳中丞廣陵陳公來撫西粵諸廢墜競舉獨道梗是念于

是檄左轄文君作經畫而督以三道自桂林而下踰陽朔屬郭君宗盤自平樂而下踰龍門屬不佞時可自劭竹而下抵蒼梧屬蘇君濬各率其屬以庀厥役薙莽刷榛批巖夷壤當冲而梁當津而崩午餐有頓宵餐有館休息有亭干撤有堡又爲之益徒騎具糧舖設緝御周不給於是宦者賈者輸將者傳舍者往來駢駢如馳驟中原齊魯之郊無不人人愉快也告竣之日憲長胡君心得過時可曰是舉也所以惠粵者甚大非兩臺眞意實志爲元元禔福澹災何以率所有位而子來衆庶若斯極耶子不可無辭余避之是役也乃始於癸巳秋九月成于甲午春二月凡石路以丈計者五千七百有奇土路以丈計者七萬八千有奇創鋪十三所在羊角廣運上仰沙冲諸堡各二所在季魚昭平富籠龍江劭竹諸堡

昭平縣志

卷八

藝文部 文記

式拾

廣州市西關洪壽直街大明承印

各一所仍舊而加修者六所爲梁一百五十有七爲渡舫十有八爲官舫一爲亭三共城且馬傭館人蒿師諸役所設皆倍于昔所費羨金共一千八百有奇其分任有司則平守黃文炳梧守周裔先梧守周宗禮等咸竭蹶趨事而平守勞尤最蓋平之役於諸郡中居其七故也時可則以主傳故佐之特爲之記敢辭不文哉

開闢府江險灘碑文

副使翁汝進

粵西三大江府江居其一會灘樂恭荔諸水建瓴而下萬山夾峙驚濤怒波中嶙峋怪石林立鳧翔積爲航艦之仇攫之無不糜潰上下相視以爲天梗不可卒夷蓋自昔爲然矣中丞龍溪蔡公來撫茲土親覲從舟糜潰於馬鞍石喟然而嘆思繼禹功以屬平樂陳郡守郡守慨然任之而異論紛起陳守笑不應募得土舍黃仲

拙足智有幹材數效急公之義所製三角船千舳飛撞五龍爪蜈
蚋鏟諸匠心獨創口畫刊拔狀甚中丞公善之前後制臺載公張
公侍御呂公議協許取費嵯羨於是肇舉開江之役屬朱二守董
焉顧必亟寒水落方可鳩工籠石維舟架木懸槎百夫鵠立瀾瀑
中前牽後掣呼聲動天橫空下擊角舟所觸無湍不分飛撞所摧
無堅不破龍爪所擊無根不拔蜈蚣所削無峭不平二守既暴露
江澣解衣投膠而黃仲拙率其五子及偕來韋峒諸兵盡忘其寒
栗顛頓與激瀾砥柱爭數千年之命而竟勝之戊己之際藤灣雷
霹檢窖龍門龍口平己庚之際馬灘上仰下仰福登穴口平庚辛
之際永灘浪灘長灘廖灘小背金雞豬牙繁洲六木鬧灘平凡歷
冬春者三而工告竣雖林立鳧翔勢不可盡去而舳艫所經無一
昭平縣志 卷八 藝文部 文記 式壹

廣州市西關洪壽直街大明承印

拳之梗雖陽朔蒼梧難以越俎而險在平樂者盡夷矣曩時諸蠻
蜂屯鶻起攻剽無忌於是有大征之役鯨鯢旣封餘魂假息於是
有屯戍之役夾岸層巒戢戢翳莽叢棘鬱爲封豕長蛇窟竇于是
有刊木除道之役深潭峭壁側岸頽崖四無蹊徑不可展足於是
有開峽津梁之役嗚呼爰有府江民害非一賴前後當事鉅公次
第捍災禔福並載郡志顧害蠻寇在榛莽在阻深雖芟夷翫築而
其後不無蘖芽圯壞孰與此九淵魁壘碎而後諸渤海之尾永貽
萬世安哉爰書其始末以志明德於不衰云

靈濟廟記

參政 陳應春

五將有神廟食昭郡舊矣靈濟宋季勅額也始自廣運遷于昭潭
祀于廣運王之左右相傳宋開禧間封侯爵端平間加仁濟等號

兩賜璽書侯能興雲雨驅疫病護舟楫有惠於茲土者甚厚郡人報祀惟謹奔走祈賽無虛日歷歲滋久威靈益炳固宜與山川相爲悠久也萬曆戊寅予天子命飭兵府江時方班師以伏養撫綏爲念而賊首張金祈廖公蠻復鼓衆內訌勦之則兔脫撫之則狼躄材官策士徒撫膺而莫誰何予與韓參戎計撫勦皆不適用惟計擒之便韓參戎唯唯禱於侯必擒此而朝食卒用間者生縛張酋五十人又縛廖賊父子六人及其黨二百五十人凱歌以旋羽纛載揚余自視孱劣匪神之力不及此于是肅牲饌詞告成事於侯而拜賜焉祭典能禦大災則祀捍大患則祀張廖煽禍積有歲年與神爲謀駢首就戮禦災捍患孰有大于此厥功章明宜受大享俾有憑託而宣其烈顧廣運神居中而五將列於左右且雜以昭平縣志

卷八

藝文部 文記

式式

廣州市西關洪壽直街大明承印

十正妃崇祀不專瀆溷不雅余心病焉亟爲侯別圖之祝祀以告卜更徙不可卜前後寢亦不可乃就廟而增飾之鳩工庀材陶甃塗黝奐然翼然加宏麗矣十正妃祀于祠後之左以別嫌釐舛庶幾哉正祀典崇報祀神妥而人安之矣廟成韓參戎請余記其事昭示永久余不揣蕪陋叙其大都如此云

重建儒學碑記

邑侯冷茂松雲南人

昭平有庠其來以世計矣迄今歲久不惟卑隘非制抑且傾頽是懼余蒞任悚然不寧欲爲大創之恐掣肘難就乃捐俸首倡而士民之慕義者一時競勤樂輸工費以助於是力請興工其制聖殿視舊尺寸層簾蓋倍之而兩廡增以六楹廟門翼以二祠重建櫺星門前門泮池又前豎坊碑額曰龍躍天池左右相配屹乎騰蛟

起鳳之觀矣殿之後啓明倫堂東西齋森然並列最後則創以文昌閣焉自殿左出聖域由義路入啓聖祠繼以碑亭宮書舍悉備自殿右出賢關由禮門入廣文舍爲堂爲室無不兼全至殿中臺座巍峨神位整麗凡鐘鼓籩豆爵罍祭器之類煥然一新斯時也正直丁祭之辰園橋門而觀望者靡不謂彬彬濟濟爲一秉禮之昭庠矣當大功初起時余不過首先創舉而好義之士捐助居多此固士民秉彝之良而吾夫子之教在人心功高萬古尤昭昭不爽也敢勒諸石以垂不朽云

重修儒學碑記

教諭 徐希達 桂平人

教者治之源學者教之地故賢者先焉重治本也秀嶽冷侯滇南人傑初仕廣濟百廢俱修士民懷德播之謳歌歲丙午宰昭邑謁

昭平縣志

卷八

藝文部 文記

式叁

廣州市西關洪壽直街大明承印

廟之日見學宮頽圯卽有重修之志於是出心上之經綸指畫以授匠氏先捐清俸爲士民倡維時署本侯二尊加意學校嘗念本學人才漸多廩額太少已請楊學臺增廩二擔又念學宮頽壞日久屢議修理無有能任其事者幸冷侯動文鼎建大當于心遂捐俸以助大工由是次第修舉先師廟向止一簷今則重之明倫堂向高丈餘今則增之泮池魁閣向未有也今則開之創之戟門之左祀名宦而右則祀鄉賢且創啓聖祠豎碑亭門堦垣宇罔不具備學街兩畔豎坊牌有騰蛟起鳳之勢卽不佞衙宇亦必構堂廳而式擴之猗歟盛哉誠一學之大觀也若侯豈不誠昭平建邑以來第一神君哉而厚望昭士之意卽於此寓諸生宜厚自樹立毋負侯之厚焉是役也鳩工於客歲臘月越今年五月而落成則以

侯之使民也悅故其成功不日耳

眞武觀碑記

邑侯柯壽愷蒲出人

聞之治民事神邑宰任也乃邑之神有境內山川社稷城隍及先聖賢春秋有享祀之禮朔望有瞻拜之禮其餘祀典所不載也昭邑城南舊有元天宮創於萬曆癸未越三十年來日就傾圮時朱二守署縣事檄士民等哀工費而更新之始于癸丑夏六月抵冬而竣事殿無門牆煥然改觀因更名其宮曰神武觀是歲仲冬予來令此首事等乞予言以識予曰若知觀中所繪塑而事者乎是北極水神也卽川之神也天一生水而土木火金始遞爲生民之用而有不乞靈于神者哉夫享祀山川一歲僅再舉禮制有限而精誠或有曠焉惟是觀台林總之精誠而崇奉之具冀禦災捍患昭平縣志

卷八

藝文部 文記

式肆

廣州市西關洪壽直街大明承印

募移建學宮啓

邑倅蕭鑑茶陵州人

余宦遊南北見郡邑所建學宮必鍾地脉之最靈者以妥先聖而蔚斯民蓋非一矣昭平雖遠處南服而家詩戶禮有古齊魯風文章甲於府江蜚鳴者代不乏人自壬寅年移學宮以向南樓下第蹶而不振懷才抱德之士每多淪落之嘆今閩邑紳士將欲轉遷輪奐晉謀於予余曰天時不如地利子輿氏之教也敢謝不敏乎

除啓聖宮自行捐俸建造外其聖殿兩廡櫺星戟門棟宇墻垣鳩工庀材不惟諸紳士久沐鬻庥固將竭力維新卽凡有志誦習者皆夫子之徒務應趨事赴功共勳厥成地靈人傑竚看五峯雲路自泮池而蒸蒸日上矣謹啓

移建文廟碑文

教諭陳九經懷集人

自古設立州縣首建學校蓋以學校者王化之本而人才之所從出也昭邑學宮原在城內久經頽圯紳士志在移建但未能力行耳余與前縣馬公全五十四年到任見學校廢弛心竊傷之因會紳衿同擇吉地四顧雲山環繞層巒疊嶂波流滌洞文峯挿天移建于此必有賢材疊鍾後先輝映聿爲王國之楨以佐聖天子休明之治也是以鳩工庀材卜吉修建經營五載大殿兩廡儀門宮墻規模甫就然莫爲之前雖美弗彰莫爲之後雖盛弗著若夫潤色而增美之是所望於後之君子云

祭三烈祠文

邑侯楊一漳武功人

嗚呼烈女兮正靜端方璞韜櫝而含輝蘭在溪兮自芳天材完節兮金百鍊而堅剛雖壺儀素有嫺兮實秉彝之貞良父櫬搖搖兮莫返故鄉何彼羣盜兮肆志鋒鋌恨不殲此讐兮豈辱犬羊高風激烈兮率二母以偕亡精誠貫日兮勁節凌霜野有悲吟兮伏臘歲將表厥宅里兮神隨在而洋洋余蒞此土兮柄司激揚嘉爾英烈兮載新斯堂嗚呼世難一死兮矧裨綱常雖丈夫或中奪兮奚女婦一門三烈之煌煌天綱立兮地維張曹娥並遊兮追高冥與翱翔倘歸嬪而賦柏舟兮曷讓共姜生爲奇男子兮必齊馨於睢

陽山蒼蒼兮水泱泱爾爲不磨兮百世有光采蘋一奠兮景行靡
亡

製造聖位碑文

舉人 廖世德 本邑人

文廟崇奉聖位禮教之大者也國學鄉學莫不皆然而其制各殊
由來久矣吾昭聖廟自移建來諸凡簡樸而聖位尤覺非體兼之
歲久傾圮更非崇奉之道建陵王斗山先生司鐸吾邑惕然而欲
新之遂詳請各上憲並捐俸二十五金覓匠選材虔製雲龍神牌
五座經始於雍正八年八月兩閱月而告成擇吉迎奉登龕斯時
也惟見氣象光昌規模美善玲瓏精緻巧奪天工於以肅觀瞻而
申誠敬卽此可見先生之大有功于名教且大有造於吾昭也迄
今仰聖靈之赫濯沐教澤之宏敷俾吾昭文運日開人才蔚起則
昭平縣志 卷八 藝文部 文記 式陸 廣州市西關洪壽南街大明承印

勸新生入學啓

邑侯 陸 焯 仁和人

恭維學憲仰體皇上培養人材之意冰心鑒物玉尺量才而諸生
以英俊之年擅才華之美得叨幟拔榮附儒林理宜卽日謁聖崇
師以先盛典乃余蒞任之日距諸生發軔之期已逾八月入學之
典何以尙未舉行余雖五日京兆而斯文骨肉何忍膜外視之謹
擇于某月日齊集諸生簪花漾彩親送學宮俾得及早潛修力學
庶出爲國家有用之才處爲鄉黨好修之士望諸生及期早赴毋
負余望幸勿初入宮墻卽自屏於名教之外也謹啓

批紳衿請給四公祠祭田執照

陸 焯

仰維四公蹟著前朝恩流昭邑峴山紀德襄人愴墜淚之碑玉壘
嗣功丞相列映堦之柏劇資而崇廟貌出自公評捐俸而置祭田
無非遺愛乃迭經兵燹衣冠邈若山河且歷有歲年禮祀埋於風
雨遺徽已逝食報何存本縣暫蒞此邦久欽前哲正擬過欒公之
社述往事以銘恩拜南陽之祠緬高風而歸厚而各紳士等永言
舊德公議新條足見江漢英賢勿剪召公之樹陳留父老不忘孝
甫之功既喜同心更嘉美意准給執照先杜侵欺另卜吉壤再新
祠宇庶幾桐鄉俎豆可以百世升馨行見汲縣榱題直至千年不
朽矣

採訪事蹟以修邑志啓

陸焯

逕啓者竊維採風問俗首須圖籍之存考獻徵文必賴志書之備

昭平縣志

卷八

藝文部 文記

式集

廣州市西關洪壽直街大明承印

上貢輶軒之採下詳民社之宜初不得以蕞爾彈丸漫焉不講也
余膺憲委暫署此邦下車之日卽詢邑志僅得殘編一本乃康熙
三十年間前令楊公所輯者大約承兵燹初平之後諸維草創已
屬不全不備之書嗣是以迄于今又七十年矣恭逢聖聖相承重
熙累洽深仁厚澤浹髓淪肌昭平雖遠居邊徼而百年以來士民
仰沐皇恩深維憲德其所以爭自濯磨鼓舞而奮興者蒸蒸日上
實與內地同符則忠孝節義之美科名功績之榮士習民風之盛
土宜物產之華應美不勝收指不勝屈而槩未有錄焉者此余所
以撫舊志而不免廢書三嘆也爰不揣庸鄙欲輯成書而孤陋寡
聞斷難憑虛臆造伏思諸君系出故家望隆巨族凡有關桑梓之
事或父老傳聞或冊籍記載定信而可徵務祈照依後開各條廣

搜博採詳細書明於本月某日親自投縣以憑選輯並面議各項事宜切囑囑切余亦自知五日京兆不難玩愒偷安然一日蒞昭卽不可弛一日之擔望諸君相與有成共敦美舉毋負余之厚望也此啓

覆陸父母採訪事蹟啓

舉人 廖當毅 本邑人

伏以大賢膺簡命七十載治運重光學士職纂修千百年儒宗有統歡騰灘水慶洽昭潭恭維老父師清標玉立純德金相甘雨隨車遍灑普天愷澤陽春有脚頻敷大塊文章錦播千重行行盡丹書綠字之奇不數河陽花種治超三異事事關人官物曲之典甯止中牟雉馴允矣郇膏大涵濡於下國卓哉召芟咸誌愛於甘棠乃猶念昭雖彈丸夙稱巖邑有人民有社稷忍令六旬餘之流風

昭平縣志

卷八

藝文部 文記

式捌

廣州市西關洪壽直街大明承印

善政闕焉不傳爲繭絲爲保障務期九里半之士俗民情昭然在目爰自下車伊始首詢及夫藹蕤泊乎百度振興遂廣諏諸耆宿各述所見共志所聞一行一言苟有裨于倫紀不妨壽諸棗梨一壑一邱若果出自生成亦宜登諸載乘斯固荒隅之厚幸得蒙慈父之褒揚抑亦國運之日隆共荷神君之雅化某自愧技窮刻鵠藝謝雕蟲牛豹才疏敢自跨乎窺管全牛識昧何敢任乎操刀惟是世居昭土傳聞不患於無稽兼之案有殘編考証亦幸其有據不揣固陋撫新拾舊昔曾撩草成函幸值採風依類分條用敢繕書呈閱所憾地處褊小財賦遠遜於名邦人實寒微庸流難齒于巨族伏願取材就地施教因人宏獎風流抽掄月旦排砂簡寶舍短取長點鐵成金改媿作好將晉乘魯史出尼山之筆削遂成千

古不易之常經而列傳世家入龍門之匠裁永作百代不刊之信史矣臨池不勝踴躍謹修燕言仰祈內鑒

覆陸父母採訪事蹟啓

舉人林作楫木邑人

昭平僻居天末山川草木之華人物衣冠之盛遠遜中州邇者我朝重熙累洽文教誕敷加以各憲栽培昭邑雖陋亦自有可志可傳者昔子厚居柳蠻洞遂成名區道鄉來昭樂土亦傳勝蹟推之功標銅柱堂號讀書石以人廉巖因程暢要皆不徒傳焉至如岑溪留孝子之居永福紀忠臣之里砂傳勾漏竹長湘妃一經名公住止莫不爭傳千古矧成公來自名邦甫下車卽留心誌乘其所以鼓吹茲土當更有駕古人垂史册者又奚但蕞爾昭平藉潤色已也夫地不終僻視乎其人齊魯晉衛古昔甯無鈍材吳越楚閩

昭平縣志

卷八

藝文部

文記

式玖

廣州市西關洪壽直街大明承印

今日已非荒服今以公之德之才來治吾昭知山川草木亦樂布其文章人物衣冠莫不標其梗概於以爭光上國誠在公耳某宅在憂中久疎筆墨採輯之事敢曰披襟然承我公謙光之厚德與委託之盛心早已神馳左右奈冬來造化小兒輩時復羈縻不絕是以捧檄之下姑以其見見聞聞者筆呈記室餘或阻于耳目之未週俟於初春續繳諒我公大度汪洋不謂邊方士子輒敢稽懶阮狂也

重修學宮文塔碑記

清道光二年歲次壬午嘉平上浣

南豐趙秉麗

今上御極之二年三月朔余奉檄權篆昭平任事之次日謁先聖宮仰見崇飾極盛雖鄒魯吳越名州縣莫是過也詢之秉鐸劉全三公具道今之學宮乃康熙五十六年前縣馬尹移建者溯自前

明萬曆四年創縣之始卽有學先後有司如冷茂松柯壽愷陳定國錢兆澧朱魁鰲皆相繼修改載在誌記迨乾隆四十八年周圭欲增完善微聞甚費民力未克竣事頗貽口實昨嘉慶二十五年彭兆麟首爲之倡邑九里半賢者仁者各視其力以助於是鳩工屬徒市材陶甃在城士紳分任其事兩齋則總理之故克臻斯盛且言尙未有記也屬余記之余因下車以來下鄉巡歷旋又分校秋闈今孟冬事竣回縣爰謹記之以刻諸石雖然學旣修矣又非徒以爲美觀也六書之義學訓數書亦曰惟數學半蓋表立焉人從而數之故謂之學況今聖天子尊賢養士誼辟汲汲誠欲得豪傑之士出於學而用於時以翊皇極以康世道或秉忠貞以佐厥辟或敷惠澤以乂厥民至於儲養待用者亦宜卓然自拔於流俗

昭平縣志

卷八

藝文部 文記

卷拾

廣州市西關洪壽直街大明承印

載在小學大學之教者可考也果能實而踐之乃無悖於先王設學之初意卽無負聖天子崇學之盛心安見吾邑人才不鄒魯吳越州縣若也余旣記其事又以勉諸生使進於古焉余自嘉慶乙丑歲叙官西粵己卯以憂回籍舟過昭潭凡十次每見一塔半傾圮心甚惜之今春服闋適官於此地而塔以落成余喜而嘆曰何其先獲我心也按縣誌前代甘公文奎筆記云昭邑以五指山爲主宗兩峽爲關鍵三寨爲屏風但馬灘無環繞之波縣南又無巍峨之勢宜於午位建立文塔則士氣興而民用足因未暇及深以爲憾甘公眞心乎愛士民者也嗣建於乾隆二十四年今又於嘉慶二十五年重建一新且增高焉是皆足以繼甘公之志也頃明經李廷贊吳邦英黃澤沛茂才阮紹昌廩生黃玉書具陳顛末余

嘉前任彭公兩學劉張兩公倡率閩邑士庶共襄是舉烏可以不記彭公兆麟四川人劉公永代灌陽人張公治藤縣人全公其敏靈川人閩邑姓氏各泐於左

重建昭平學宮文塲碑記

清同治三年

張鳴鳳

嘗聞敦士行莫重於倫常勵人心莫先於文教昭平之有大成殿文昌宮也士行於是乎敦人心於是勵蓋百年於茲矣咸豐七年凡茲殿閣悉遭兵燹憫聖靈之失所屢欲翬飛奈烽火之頻興未遑龜契越六年知府銜熊公壽山攝理斯邑欣然以興復爲念輒屬邑紳而告之曰芹荒於泮無以講倫常也桂蝕於宮無以興文教也邑紳曰唯唯爰乃集同人諏吉日各仍舊址式煥新猷狐腋成裘二千兩幾經棘手鳩工興役三四人具費匠心未幾熊公卸

昭平縣志

卷八

藝文部 文記

叁壹

廣州市西關洪壽直街大明承印

篆邑宰同知銜吳公國梁踵成其美所由百堵皆興大觀在上華而不侈質而有文也嗣是宮牆數仞得其門者美富同瞻廣廈千間肄其業者絃誦不輟父兄子弟以是爲陶成庠序師儒以是爲董勸行見不越禮門義路之規士皆敦行深明福善禍淫之理人盡勵心豈徒掇巍科登高第足見文風之不變景運之日隆已哉是舉也邑紳歲貢生莫汝功吳世勳鄒春逾廩生左熙等實司其事經始於同治二年十月以三年十二月落成邑人曰是不可不記聊次其巔末而記之

按清光緒三十年罷科舉三十三年改文塲爲明新兩等學堂堂內所供之文昌像於民國元年壬子歲縣知事周維宗焚毀之今無復有文昌宮名

昭蒙兩路修路田碑記

黃純熙施

黃 价

嘗聞遵路而曰蕩蕩履道而歌坦坦皆言平也然僅平焉而遞歲勿繼以芟刈之力則荆棘叢生往來者雖無嗟於險巖寧不慨於荒蕪乎由此觀之凡通衢要路有心者莫不於此兢兢致意焉我仙廻通永安與昭城二路爲出入必由之要道豈可任其蔽塞乎是以吾父純熙公於雍正十二年恩授司鐸南寧之日誠心樂捐己之糧田二坵約租七百斤作每年春秋修刈之資其意可謂厚且美矣詎意吾父司鐸日久在任捐館吾兄相繼而逝未獲建立碑記於茲三十餘年至今耕此田者漸有視爲故事之意往往不如期刈修置吾父之德於不顧使此二路蓬蒿沒跡而爲禽獸栖遲之所良可慨也矧予年屆知非且恐我後人賢愚不等世久年昭平縣志

卷八

藝文部 文記

叁式

廣州市西關洪壽直街大明承印

計開修路田畝於后

一土名古猛大田一坵修永安路自本里黃茅嶺脚起至永安古蘇堡六章冲口止

一土名橋董大田一坵修昭平路自本里王村背起至佛登冲止

一每年修割二次春自三月秋自七月
一占屯糧銀壹錢式分交屯糧長上納

清乾隆三十年三月二十四日黃价立

修接米嶺並馬鞍西平路碑序

慶遠府尊徐士珩

龍平巖邑也所屬地方多崇山峻嶺其最險而尤著者莫過於土名接米嶺在邑之東南方離城百里有奇其嶺綿亘數十里深谷高崖羊腸鳥道車不得方軌馬不能縱馳縱杖策優游猶刻刻凜臨深履薄之虞而況其爲負荷往返者且地當孔道爲凝文招見龍二五各都里赴邑郡趨省城必由之路余昔年欽奉簡命來宰斯土因公親歷險途日擊征夫困苦行旅艱難久欲勸捐修治以便行人嗣蒙大府以異最特疏題荐奉旨入覲楓宸有志未逮後復重蒞茲土而嶺道險危如故康莊未闢豈天險之難平歟抑亦人工之未盡也余極欲平此險途以稍盡利濟之心適紳士莫靄然等稟請勸捐與余同志但慮工繁費巨獨力難支是以捐廉伙

昭平縣志

卷八

藝文部 文記

叁叁

廣州市西關洪壽直街大明承印

助而外與紳民等公議發簿勸捐幸所屬士民踴躍同心樂襄善舉或捨仁漿或餽義粟有採花釀蜜之資集腋成裘之美當卽諭令紳民等公舉督理之人覓工雇匠相度險夷畫定繩尺卜吉興工其修治之處始自黃姚馬鞍嶺以迄西坪而止閱數寒暑而巨功告成紳民等稟請踏看新路共慶落成余公餘命駕往視但見從前之鳥道羊腸盡闢康莊可以聯騎並駕斯不獨杖策優游者行所無事卽負荷往返者亦攸往咸宜矣嗣因陞任及期琴鶴晉省紳民等不遠千里走稟請余序其巔末以垂不朽余旣喜紳民等之樂善急公以爲將來勸且喜此嶺之易險爲夷以爲萬世利微紳民之請余且不能無言况遠趨稟請余不禁有樂乎其言之是爲序

重修文明閣記

梁端章

距黃姚街東南隅一二里有山焉風景佳絕鄉先輩於林麓山腰之際建閣於其上額之曰文明亭臺錯落樓閣參差山水幽奇長林蔭翳曲徑紆徐左縈右拂洩千載之秘而成一代之偉觀者也迄於今年湮世遠興廢不常非復曩時之盛矣其存者則豁然亭福緣臺魁星樓也其不存者則信筆拔秀不夏桂花步雲諸亭也夫世間無不朽之物惟修復循環可以維持於不敝戊午春風日清美余與莫臧辰覃少海李巖谷李培芝莫義普蒙民礎等因小西湖鳶飛魚躍之刻觴會於此周遭流覽江山無恙棟宇摧殘觀斯危象得不憮然用是聯我同心慨然倡首按戶簽題大欸雲集鳩工庀材甫閱月而百廢俱興而又創建山門所以引人入勝工昭平縣志

卷八

藝文部 文記

參肆

廣州市西關洪壽直街大明承印

竣泐建欸芳名於石屬余爲文以記之或曰毋庸記夫山林朋友之樂造物不輕予人殆有甚於榮名利祿也吾人每當讀偶暇詩酒狂時少約朋儕來此游覽相與流連風月嘯歌懷抱蓋自少而壯而老每一過焉樂而不能去是山林朋友之樂造物亦旣與之而不使後人知之可乎雖然山林朋友之樂亦視地方之隆替爲轉移如或政教凌夷異端蜂起賊盜滿山干戈徧地傷百計之窮蹙嘆民命之倒懸悲天憫人方且不暇而載酒携朋放浪於山林之間樂以忘疲不可得矣能勿戚歟而且此閣迭此修復是修其尙存者其不存者當留一語以勉後賢嗣而恢復之免貽不完不備之憾又烏可以不記若夫山雲林樹四時烟景而可以備詩人之登高寓離騷之極目則覽者自得之皆不復道

讀書岩記

葉萬鵬

丁巳夏五月偕友人游吾鄉之讀書岩白山下循蘿徑直上古木垂蔭羣蟬競鳴達岩端卽見小鄉嬛三大字鐫於石筆法韶秀蓋梅州葉鶴珊先生手蹟也自林廷幹講學後文化日進騷人逸士題咏頗多從右入不數步穿石門其中洞然如出神工鬼斧遠覽清溪水光奪目四山環碧映入襟袖岩前欄以石視其下一落千尺惴惴焉猶虞或墜也村舍竹籬鷄犬鳴吠之聲相聞牧笛樵歌亦接於耳到此令人作世外想過左岩數武間日光入焉惟林木森然翳岩口阻眼光讀書者於此當得返觀之學春夏間花落時繽紛而下微風飄忽可以侵書幌而入硯池至石溜滴滴有聲夙興夜寐又可作蓮漏聽也友曰斯山也鍾天之秀僻在窮鄉將終

昭平縣志

卷八

藝文部 文記

叁伍

廣州市西關洪壽直街大明承印

燕沒於世盍志之

吳于氏墓誌銘

無名氏

烈婦吳孺人于氏女也性淑婉聰慧絕倫讀書過目輒成誦尤喜讀孝經列女傳每欽仰前賢輒曰歲寒然後知松柏苟處其境當不負所學古今人豈相遠哉常詠露筋廟詩有句云天荒地老筋常存海枯石爛心難變尤足以見其志而知其人壻家吳姓爲龍平望族夫壻僑如君乃吳太守子寅之弟素敦詩禮世家也烈婦自于歸後魚水甚篤事翁姑以孝處妯娌以和待臧獲以寬以故家人咸稱之姑慈婦聽夫唱婦隨誠天倫樂事也詎意瑛花易摧良玉竟毀留侯善病顏回早夭雖殷勤進藥人事難以勝天而慷慨捐軀矢志願隨入地時也一燈如豆五內皆崩月夕花晨徒增

切怛春風秋雨皆繞離愁何處招魂徒歌楚些誰家弄笛空聽秦
樓倚使伯道有兒猶堪苦守其奈中郎無女益更悽愴偷生無益
證果蟾宮視死如歸隨君冥府雖割鼻矢誠梁媛表節刎耳見志
令女守貞而猶未若烈婦之從容盡節飲阿芙蓉於戊午十二月
以終也嗚呼生不逢時雖生無益死得其所雖死猶榮題曹娥之
碑黃絹安在過王嬙之塚青草依然且夫人之所最難忘者情也
而人倫尤爲至情自古志士仁人以身殉難無非一往情深有不
自知者非可強而致之也夷齊殉紂伍尚殉奢公子壽殉急子羊
角哀殉左伯桃此皆於君臣父子兄弟朋友間善用其至情然皆
丈夫責也而婦人之當盡情者厥維其夫烈婦殉夫其境雖與四
子異其志實與四子同而四子之名存烈婦之名湮其外兄尙焜
昭平縣志

卷八

藝文部 文記

卷陸

廣州市西關洪壽直街大明承印

憐其節嗣以子恩煜並託余爲之誌其墓不揣菲才爰爲之銘曰
烈婦之性恭儉溫良烈婦之志日月爭光烈婦之靈俎豆馨香烈
婦之風千載流芳

此篇採訪者謂爲丙辰中秋節唐孟浩然降乩所作但細閱
其文確似近今筆墨與孟文迥不相同或者時人作成假託
乩語故以詞人孟公署名用示神奇亦未可知吳于氏節烈
晚近來不多概見墓門憑吊風化攸關其事傳其文亦與之
俱傳矣編者識

重修四公戴公二祠鼎建三烈祠碑記

嘉慶廿四年歲次己卯孟秋

邑之東岸西廂向有四公祠戴公祠三烈祠建自有明當時士庶
捐資置業以備祀典將藉以報功揚德表幽馨而勵風俗也國朝

鼎定後田業湮沒祠宇傾圮所謂春禋秋祀杳已無傳迨乾隆之
己卯邑侯吳諱視來宰吾邑始查出原業暫歸禮科分穫雖無祠
宇之可觀而麥飯之祀莫或廢也辛丑歲承署邑侯李諱秉義將
各祠租業釐定委交諸生馮區李者董理焉因而有儒學漸管之
舉迄今數十年來其間積貯之項銷存不一及歐邑博任貯項頗
饒乃竟視爲若己有之緣是翟陳關黃諸耆老起而論之僅獲百
金有奇并馮粹亭貯項遂屬渤海邦英暨同事委而任焉鳩工聚
材擇地興作經始於戊寅之仲冬越數月而落成殆昔之圯焉無
存者今則峻宇雕牆矣昔之樑棟將摧而敗瓦欲墜者今則煥然
維新矣爰得畧記其概勒諸貞碣以爲重建斯祠之由云謹記

首事

翟良模 李廷贊 蘇魁杰 黃彥圖 關英 潘樹政 黃錫書 姚虞書
陳燦昭 陳燦南 吳邦英 馮鴻鎮 何秉義 李方蘭 馮貞義 關岳萬

昭平縣志

卷八

藝文部 文記

卷八

廣州市西關洪壽直街大明承印

附城義倉碑記

光緒四年

裘憲璘

嘗思義倉之設由來尙矣本縣蒞任以來起視龍平廬竈雖炊烟
密布儲積未見雲屯附城貧民艱於日糴倘遇春雨纏綿玉粒頻
愆節候秋風蕭颯金穰莫告豐盈縱使議蠲議賑葺屋未息庚呼
曷若斯倉斯箱茅簷畧占子惠爰集紳與商設立義倉僉曰唯唯
於是始發緣部勸附城一帶簽題本縣則鶴俸重捐鄉閭則蚨錢
弗吝連籌欸項統計得九百餘金除建義倉銀三百有奇尙存六
百餘兩概行採買穀石將見坐擁紅陳乃倉致露積之慶種盈黃
茂比閭泯星留之嗟閒有時稻未香諸南畝旣無侯秦伯汎舟禾
未熟乎西疇又奚煩魯師告糴自設之後出陳入新勿辭辛苦慎
終如始一秉至公庶不負本縣愛民如子之深心也勒諸貞碣永

垂不朽

創建同義祠碑記

光緒二十年

梁濟普

夫倡義之難難於始事成事之難難於終事同其義者均不可忘者也我昭蕞爾偏隅向無善舉每觸矜憫之情輒乏拯援之力由來已久安習故常而欲舉地方未有之事而濫觴之此豈易哉同治間偶商是舉咸樂同懷集股數百合資盈千宰官爲之襄助婦女亦樂捐題計月窮年錙銖累積乃行方便兼權子母設質所利同人旬有餘年始觀成效又旬有餘年漸廓規模所有疾苦顛連靡不關情周恤更或災罹水火尤爲度力捐資雖非大庇歡顏亦足少償私願此在偏隅小地可謂好義有成矣僉曰靡不有初鮮克有終有善弗錄非所以示明訓也厥臧弗嘉非所以別淑慝也昭平縣志

卷八

藝文部 文記

參攷

廣州市西關洪壽直街大明承印

以勸人心以勵風俗胥於是也爰建祠而合祀之庶幾以義始而以義終矣是舉也自同治庚午歲迄今念有五年董其事者黃君吉甫黎君支百崔君子餘尤有力焉茲當祠宇落成之日聊陳巔末用勒貞碣

修立字祖廟碑記

同治十一年歲次壬申孟秋

恒言飲水思源誠不忘所自始也况字爲天下至寶帝典王謨聖經賢傳道德勳名百家衆技靡不藉字義相通而流傳於勿替惟倉沮二聖實創始焉治易結繩特啓生民之知覺功成書契肇開宇宙之文明固宜後之人俎豆馨香以奉之也乃昭平自開縣以來廟宇祠壇凡所爲報功崇德者無不畢舉獨字祖廟未建毋亦前人之有待於後耶壬申春吾昭士人追二聖造字之功欲立廟

以祀越日卽邀同志者告於衆曰書契之傳四民不能外也淵源有自萬世所難忘也崇祀字祖吾人之報本也扶名教培文風又胥在是也衆皆唯唯於是踴躍捐資共襄美舉頃刻簽就得銀八十金爰相舊五王殿而經營之諏吉修立規制一新以爲字祖廟復於各處街巷造惜字爐三並廟內惜字爐一月餘工竣僉曰是不可不記爰據實而勒諸石若夫潤色而增美之仍有待於後云

重修西寧社序

西苑 李挺然

攷古立社之制壇而不屋所以通天地之氣而納四序之和者也立社之義共井同溝所以聯桑梓之情而申祈報之忱者也西寧社主建自有明爲城廂內外迎秀南關之保障歷年祀奉設有壇墀第世遠年湮經風雨之剝蝕不無摧殘拓落似非妥侑神靈之

昭平縣志

卷八

藝文部 文記

卷八

廣州市西關洪壽直街大明承印

體歲在辛亥初春會集同人共商重建僉曰美舉互相踴躍雖多寡不一皆量力題捐以輸誠悃遂擇吉倩匠易之以石不旬月日工卽告竣神靈有所憑依矣庶春祈秋報而桑梓之情洽民康物阜而四序之和集爰題小序并掇芳名勒諸石以垂不朽云

重修春亭社序

黃可學

竊聞郊祭天社祭地故泰壇與方澤典並重於周官蒼璧與黃琮禮特隆於前代上自侯國下逮成羣莫不立社由來久矣昭邑城東外地脈鍾靈山環水聚樹林蒼鬱秀氣森羅社壇建焉乃華居昇平安樂三坊奉祀之神以保民而阜物者也舊創壇壝歷年旣多已經頽圯我三坊共議捐資重修鳩工命匠築以石砌以磚閱旬餘而告成從茲壇墀維新神靈赫濯春而祈秋而報永藉厚澤

之滋培老以安少以寧共沐鴻庥之庇護祀隆千載福錫三坊允宜勒諸貞碣以垂不朽

重修城隍廟神像新建頭門碑記

張秉銓

邑之南有廟昔之人卜地於斯恭奉城隍尊神幾何年矣靈爽式憑赫濯久著真一邑之保障也銓以蒞任時謁神見廟宇半頽頭門以外鞠爲茂草殊非妥靈之道爰集紳耆商民羅錫謙黎著經等謀議募修首先倡捐若干金乃詢謀僉同不數日集百金雖諸公之樂善有同志亦以見神貺之昭昭也於是污者淨之破者葺之隘者昂之廢者復之曾幾何時煥然一新自是有感必孚無求不應敬上以惠我無疆區額仰答神庥夫爲民興利除弊縣官之職也爲民降福澹災神之職也銓雖未能無曠厥官而於地方利弊固無不孜孜求之期無作神羞也三年以來境內乂安晏然享太平之樂安在非神鑒在茲以爲民諸請命哉然尤望吾民以事人者事神倫理旣修斯幽明來格神之報德更未有艾也是爲序

重修關帝廟碑記

同治十二年

宏維祀典本崇德而報功保護生民合明禋而廟享况乎氣壯山河忠扶炎漢光爭日月靈顯熙朝如關聖帝君者直省各府州縣靡不立廟以祀春秋聿隆夫告虔歲序常殷夫祈禱自漢以來歷年顯應晉封曰帝君尊崇曰夫子迄於今莫不輸誠以獻矣顧人心之誠皆帝君之誠爲之也誠至爲神故伏魔蕩寇真體物而不遺誠感斯格故慕義懷仁經累朝而不異固宜垂勛名於萬古享血食於千秋矣溯我昭城之建帝廟也惟有歷年乃物換星移神

靈不顯而風銷雨蝕廟貌無光雖修葺之已久荒頽未免塵污既供奉之維艱對越何堪圯壞爰集城廂紳商士庶經畫咨謀廟須重建恢宏規制僉議皆同一時遍行知單幸捐資之踴躍於是公舉司事賴料理之周詳乃龜契以下吉乃鳩工而庀材仍其舊址煥厥新模隘者寬之陋者飾之質而有文觀瞻宏壯華而不侈體統崇隆是舉也合大殿後殿兩廊頭座神像一概翻新共費千五百有奇自癸酉仲秋興工至甲戌某月落成焉固知一木難支當事者幾經棘手惟是衆擎易舉簽助者共矢葵衷要莫非帝君之精誠感召而萬姓之輸誠恐後有以聿觀厥成也工既竣合將捐資姓名臚列並壽諸貞碣焉

重修泗洲寺碑記

道光八年

何廷範

昭平縣志

卷八

藝文部 文記

肆壹

廣州市西關洪壽直街大明承印

嘗思山之高者仙自名地之勝者佛自顯故香流溪水曾開石室之庵錫卓峯巔乃啓東林之寺是境也比丘之沙纏護梵塔隨肩羅漢之水凝朝慈航滿目允合泗洲佛士建興大聖禪林無如創自元明幾見官民改作年延國代未經善信修爲租穀雖可飯僧敝宇不堪供佛遂致菩提樹下妙相侵凋般若聲中宗風冷落墓等念先人之遺基尙在幸大衆之力舉惟輕故於去歲開捐業已倒堂重建頗增舊制外添一座山門不沒前程仍列羣公主祀嗣此常輝貝闕祇園樹長兆三多不朽金身優鉢花開綏五福所賴諸君樂善咸蒙各信捐資必勛而以列清明並田坵而存誌刻共揚姓字永著碑碣是爲引

重建石階頭水淹鞏橋碑記

同治乙亥年

黃寶臣

昭城外東北隅土名石階頭前近白土旁連水淹上至平樂下抵
縣城實四達之區界一溪之水舊有橋梁曾經崩陷數十年每逢
水淹泛漲往來行人不勝望洋之嘆卽繞道尤多險阻不便殆未
免視爲畏途矣乙亥夏首事集議造橋因勸捐樂助踴躍贊襄於
是諏吉鳩工鑿石開道相其地酌其宜先於石階頭處築一鞏橋
階級層遞次於水淹處築一鞏橋俱寬平可容車馬復將高龍白
土衝要各路疊石砌平變險阻爲康莊易畏途爲坦道衆稱便焉
夫時行方便廣積陰功人人可爲之事茲之美舉是也業披荆而
斬棘幸集腋而成裘修數百年崎嶇利千萬人來往如矢如砥行
道其蒙福矣閱數月工竣乃核算前後共費銀二百七十餘兩合
將捐助芳名臚列勒石以垂不朽云爾是爲序

昭平縣志卷八

外紀部

凡事有不僅於昭而昭亦與之卽僅於昭而無門以統之者陸志別以外紀茲因之並附以民國歷年概略以殿於卷末編者識

雜誌

萬曆二十六年正月副使林廷陞出巡適把總會唯與北陀撫獞黃朝田有隙中以蜚語遂下朝田於獄其部落數千人中懷不安遂鼓譟圍城越月而桐亮獞盤花婆乘機寇龍塘營擄提調指揮朱元慶家口又越月而橫溪石狗等獞唐則婆寇平西下陂殺生員莫汝賢等十餘人擄掠人畜無算指揮張懋功死之亡何荔浦韋扶仲復糾大小兩江賊攻陷下峒二司城于是平樂之巖頭獞

昭平縣志

卷八

外紀部 雜誌

肆叁

廣州市西關洪壽直街大明承印

恭城之站面獞各乘釁倡亂聲言流劫郡邑人心惶然推官江中楠時署府事獨擁孤城竭力防禦至七月大中丞戴燿移鎮平樂調漢土官兵六萬人以都督僉事童元鎮爲總統副總兵孟宗文侯國弼李應揚參將楊元都司甘霖遊擊郭酉科統兵六萬分道並進復檄參政陸長庚參議朱東光監督糧餉首克北陀九冲府江一帶次破站面獞初巖頭諸賊恃站面天險據之以抗我師燿授諸將以所製火器攻之一發無噍類又乘勝進攻荔浦賊首韋扶仲就擒是役也斬首二千餘級諸賊悉平乃議北陀設撫夷同知康熙十三年三月二十日定南王孔有德之婿孫延齡反廿九日僞副將李秀發吳懷玉等陷平樂時吳三桂兵已抵湖南廣澧州矣先是十二年冬杪吳逆遣僞官路有時密齎劄印遺孫延齡

延齡尙猶豫未決適其妻孔四貞入覲被劾因懷怨懟反謀遂決
二月十八日收孟一茂等謀奉僞朔三月二十日遂反稱僞周元
年廿四日發兵攻平樂廿九日城陷於是邑之士民不見天日者
幾六年康熙十七年正月撫蠻滅寇大將軍廣西巡撫傅宏烈與
南寧將軍蟒吉兔等都統王國棟等總兵班際盛恢復梧州乘勝
拔富川賀縣昭平遂進攻平樂僞總兵魏某王某等率賊衆及猓
猓三千出城迎敵至山口望見我兵漫山遍野帳房如雪畏不敢
進退守入城十六日大兵至城下賊衆堅守發過山機鳥槍遙擊
我兵多被傷又發猓猓伏西查街詭開城門樵汲我兵乘虛攻之
伏發反遭其毒乃環城遶山列壘以困之分屯西北岸二十日僞
將軍吳世琮率賊兵五千來援屯季魚堡對江爲大壘三我滿洲

昭平縣志

卷八

外紀部 雜誌

肆肆

廣州市西關洪壽直街大明承印

大兵則屯季魚堡列營凡六二月朔賊之前鋒劉仕龍由荔浦江
乘小舟突至南岸江口我兵始猶堅壁不出賊衆奮力環攻諸營
乃稍稍出敵惟羅定協中軍都司吳錫綬以孤軍衝其鋒直入重
關殺傷相當而他營之出敵者忽先退錫綬獨率所部奮勇血戰
然衆寡不敵所率千總謝得功譚英把總翟應麟百隊雷振何華
楊昌梁大與經制兵八百名俱膏刃陣前無一存者而漢滿大兵
遙駐北岸以急流澎湃竟莫敢濟錫綬弓折矢盡猶躍下馬取石
擊殺數人而拔佩刀自殺于是賊兵縱火連燒小營盤七座平樂
副將徐援時率兵拒滙塘灣方列陣迎敵而他營兵俱棄柵亂竄
援勢孤亦走我兵渡河投大營者淹死以千計世琮遂入城是夜
各營拔寨退至榕津次日賊見所棄糧草輜重遍野出城收掠無

心追襲我兵復退至鍾山鎮招撫督捕理事官麻勒吉挽留諸軍不得竟棄富賀而走梧州世琮乃遣李自安復陷富賀蔣世傑復陷昭平又命徐援之子招援援復降逆於是所得之地盡失十八年春大兵恢復平樂自是平郡之士民始離湯火云

鄭茂字士元福建蒲田人嘉靖間以河南按察使左遷府江兵備道時諸蠻作亂茂督兵征剿斬首四百餘級諸蠻奔潰乃于六巢各置一堡設兵屯守諸殘蠻不敢復進先是諸猺憑凌出沒伏箐勾劫官捐魚鹽之美餘每歲犒之使不出而肆毒如故船非聚至百不敢發茂至卽上書督撫大集軍兵直搗其巢斬馘一千六百有奇以三峒同爲諸巢心腹改二土司屯兵扼險開仙迴馬尾二營以通永安復修廣運足灘二堡以控府江創昭平縣治以控平

昭平縣志

卷八

外紀部 雜誌

肆伍

廣州市西關洪壽直街大明承印

梧殘猺斂跡投欵今艦艘不滯旅次無恐皆其績也

五指山特出五峰巖內空濶能容萬人巖口止一孔四壁陡絕而江水穿流於內昔人闔其要害以致師出無功萬曆四年府江道徐作參將吳京復征之二五都千夫長潘積讓委官王銅多方採取攻巖之策時有屯賊內潰獻計取賞卽與銀五十兩遂得其窟穴出入要路每裝銃數十排用石子于內埋伏巖口伺其出沒齊發以擊之攻取旬日而破諸賊卽於巖前設立房堡又設兵五十名以垂久遠

昭平地界平梧之間岷嶺環峙灘水湍流叢薄密箐嵐烟瘴霧雨倏而寒霽倏而燠一日可更裘葛焉秋末冬初其氣乾燥瘴癘尤

甚錄前志

晁錯曰揚越之地少陰多陽李侍制曰南方地卑而土薄土薄故陽氣常泄地卑故陰氣常盛陽氣泄故四時常花三冬不雪一歲之間暑熱過半人居其間氣多上壅膚多汗出腠理不密蓋陽不反本而然陰氣盛故早晨多霧春夏雨澤一歲之間蒸濕過半盛夏連雨卽復凄寒衣服皆生白霉人多中濕肢體重倦多脚氣等疾蓋陰常盛而然陰陽之氣既偏而相搏故一日之內氣候屢變諺曰四時皆似夏一雨便成冬又曰亟脫亟着勝似服藥氣固使然耳

梅摯瘴解曰瘴氣者出山嵐風水之毒與草莽沴氣鬱勃薰蒸而成寒與熱同作或但熱不寒發渴有時全似瘧疾而南人百病不問症候通命曰瘴妄投藥石速禍者衆凡此者其疾似瘴非眞瘴

昭平縣志

卷八

外紀部 雜誌

肆陸

廣州市西關洪壽直街大明印

也卽瘧耳炎方地脉疏而氣泄愆陽弗收人爲常燠所曠膚理脈絡不密山川草莽之氣感而相薄故易成疾又地氣雖常燠天地乃無常不問四時晴霽便熱或有風雨俄頃便寒將護稍失百病橫生此又在水土氣候之外一歲無時無瘴春三月青草瘴夏四月黃梅瘴六七月新禾瘴八九月黃茅瘴又曰桂花瘴菊花瘴土人以黃茅瘴尤毒荒野岡阜無他草木惟茅生之葉焦黃時暑氣鬱蒸人行茅間爲氣所愀昏眩煩渴身熱頭痛且數十里無陰可息又無泉井行遇潢汙不得已而飲之暮夜無逆旅野次風雨中幸至州縣又無醫藥嘗以他瘴委頓大率類此

方書曰南人凡病皆謂之瘴率不服藥惟事祭鬼設犯傷寒陰陽三症豈有坐視而不藥者耶且南方之人往往多汗上盈下虛用

藥者妄發汗吐下禍可立而待也瘴癘之作率因飲食過度氣痞痰結檳榔能下氣消食化痰故嶺海人多食之

宋王棐瘴癘說南方天氣溫暑地氣鬱蒸陰多開故陽多發泄草木水泉皆稟惡氣人生其間元氣不固感而爲病是謂之瘴輕者寒熱往來至類瘵瘴謂之冷瘴重者溫熱沉沉晝夜如臥炭火中謂之熱瘴甚者一病失音莫知其所以然謂之瘵瘴冷瘴不死熱瘴久而死瘵瘴必死此方書之說也愚謂瘵瘴者非傷寒失音之症乎非中風不語之瘵乎治得其道間亦可生安得謂之無不死耶若夫熱瘴乃是盛夏初秋茅生夾道人行其間熱氣鬱蒸無林木以蔽日無水泉以解渴伏暑至重因而感病或飲食不節偶成此症熱晝夜不止遲至一二日則血凝竟不起矣南方謂之中箭

昭平縣志

卷八

外紀部 雜誌

肆業

廣州市西關洪壽甫街大明承印

亦謂之中草子然挑草子法以針刺頭額及上下唇仍以楮葉擦舌皆令出血徐以藥解其內熱應手而愈安得謂之久而死耶至于冷瘴或寒多而冷少或寒少而熱多或有疊日間日之異及其愈也瘡發於唇驗其病卽是瘵本非重病每因誤而致禍亦不可以不死而忽之但診脈息極微見元氣果虛投以附子川烏等藥而愈或投以寒藥所謂乘氣入胃陰盛乃亡若診其脈息洪盛審其症候實熱且服和解等藥而徐治之或誤投熱藥所謂桂枝下咽陽盛則斃但診脈而用藥萬不失一然觀其形氣之怯壯察其脈息之虛實參以疾之盛衰分其症之陰陽極工巧以審之其庶乎頃自入廣以來但用修養之法晨興盥漱後先服平胃散間或投以金不換正氣散洗面後少啖粥已時早食申時晚食夜則服

消食等藥聚會而節飲不宜大醉及頻數耳但一日之間寒暖數變却須脫着以時少食生冷則脾胃自壯少食油膩則胸膈自快毋大忿怒以傷天和重節色慾以固真氣如此調攝方可以無恙也

土語曰避色如避難衣服隨時換須飲辰時酒莫食酉時飯

曾士揚曰昭州春夏之交淫雨彌旬潦漲時發棟礎常若汗流衣服器皆生白醭三伏炎熇尤甚一歲中五瘴迭作人中之暴則生瘴熱霍亂緩亦生瘵瘡痞脹脚氣脾泄諸症

大學蔣冕府江三城記曰灘水經桂及昭會恭荔而趨梧州曰府江山皆壁立林箐幽阻獠人據險伺隙剽劫官船商舶其間最要之地曰廣運曰足灘曰昭平上下百餘里昔立三堡戍以兵然無

昭平縣志

卷八

外紀部 雜誌

肆捌

廣州市西關洪壽南街大明承印

城垣屋宇樹竹木以爲營一遇炎風寒雨軍士仍棲息舟中嵐氣鬱蒸病死相枕其幸存者精銳之氣已銷孰能揚臂鼓勇以當賊鋒哉兵備副使張君吉議城三堡方始事於廣運卽擢憲使去莆田鄭君岳繼爲兵備念前功未究思續成之應城陳公來總督軍務慨然報可其年冬城足灘廣袤百餘丈明年戊辰城廣運因張副使之舊而加葺築砌焉繼城昭平西岸有廢城成化中總督朱公所築後陷於寇將營新城其父老請移廢城舊壁以助費乃爲城一百八十餘丈門二樓八屋七十楹移驛舍巡司于城內虛其地三之二以爲民居而於三城外皆環以壕塹其深廣俱十餘尺豎旗標於方隅嚴鉦鼓于日暮凡攻守之具無一不給焉旣落成形勢壯偉規制完塹屹爲一方巨鎮君以書來屬予記其事遂叙

次其始末如此

五月五日聚諸蟲豸之毒者並置器內自相吞食最後獨存者曰
蠱有蛇蠱蜥蜴蠱蜈蚣蠱視食者久暫卜死者遲速蠱成先置食
中味美百倍歸或數日或經年心腹絞痛而死其魂則至置蠱之
家爲之力役猶虎之役俚也其後夜出有光熠如曳彗是名飛蠱
光積生形狀如生人是名挑生蠱影積生形能與人交是名金蠱
蠱于是任意所之流毒鄉邑殺人多者蠱益靈家益富恭富昭賀
間蠱術公行峒官潛知其狀令巫作法壓之取婦埋地中出其首
澆蠟燃之以召冤魂魂不能附種婦代鬼返罵而死否則不能置
之法也鮑明遠詩吹蠱痛行暉蓋飛蠱也按周禮士訓掌道地圖
道地隱疏云地隱蠱事人所爲也周時荆揚不入職方王制南不

昭平縣志

卷八

外紀部 雜誌

肆玖

廣州市西關洪壽直街大明承印

盡衡山則西北亦有蠱矣國語曰霄靜女德以伏蠱隱謂女惑男
如蠱使人形神雙喪精魂爲其所役也張衡思元賦咸姣麗以蠱
媚考增孀眼而娥眉則房中亦有蠱矣何必鳩舌鵬題騷人羈旅
始爲惑哉凡中蠱者顏色返美於常妖姬望之而笑必須叩頭乞
藥出一丸啖之立吐奇怪或人頭蛇身或八足六翼如蝌蚪子斬
之不斷焚之不燃用白礬澆之立死否則對時復還其家余久客
其中習知其方用三七末葶薺爲丸又用白礬及細茶分爲末每
服五錢泉水調下得吐則止按古方取白蘘荷服其汁併臥其根
呼蠱者姓名則功緩也

五將相傳鬱林人宋宮殿災五將救免不受賞爲商至昭潭遇難
封爲神五姓金銀梅劉柴又云在宋時禦寇有功德廟食茲土故

昭平有五將灘與堡之名今之客商往來禱賽輒應

宋開禧元年乙丑九月廿三日封五侯勅曰勅昭州龍平縣靈濟廟第一位等君以民爲本民以食爲天國有水旱則時以無年民斯苦病桂嶺之南維昭州之屬縣叢祠其神有五顧興自紹季年嘗錫廟稱凡旱乾禱祈暨民有癘疫率蒙休咎一方攸賴部使者以聞爰加侯封示麻寵尙嘉賴乎有氓斯爲克稱可依前件奉敕如右牒到奉行第一位神可特封金殿嘉應侯第二位神可特封銀殿顯應侯第三位神可特封梅殿昭應侯第四位神可特封劉殿惠應侯第五位神可特封柴殿通應侯欽哉

端平元年三月一日加封五殿敕曰敕昭州龍平縣靈濟廟嘉應侯等朕惟有位咸秩百神非有功於民不居祀典爾屹彼靈祠奠

昭平縣志

卷八

外紀部 雜誌

伍拾

廣州市西關洪壽直街大明承印

於侯服山川能致雲雨皆汝之功舟楫以濟不通皆汝之祐是用嘉乃丕積申命徹侯於戲神苟能益懋乃功則封崇之典實未艾也可依前件奉敕如右箚到奉行敕告嘉應侯等茲特封金殿嘉應仁濟侯銀殿顯應仁祐侯梅殿昭應仁澤侯劉殿惠應仁順侯柴殿通應仁茂侯欽哉

明萬曆廿五年民間相傳有廣福王之神能附童子言人禍福及地方兵革農家豐歉諸事村野愚民與猺獠思亂者往往信之時桂林平樂鄉落間鳴金撾鼓創廟禱祀者無虛日而平昭二邑有尤甚未幾遂有黃朝田之變而桐亮猺盤花漣繼之又越月而黃溪石拘諸猺唐則婆等荔浦撞韋扶仲等及岩頭站面諸猺相繼盞起矣此等妖妄之事初起時不過二三思亂者倡爲邪說以誑

惑一方耳爲民上者一有所聞卽密訪而懲戢之當應時解散何任其鼓煽流禍至此極耶嗟乎作吏豈不貴有卓識哉

昭平縣志

卷八

外紀部 雜誌

伍壹

廣州市西關洪壽直街大明承印

民國紀畧

地方一經變亂人民生命之犧牲財產之損失動不可以數計而元氣大傷非數十年後不能恢復誠痛事也自清咸豐二年洪秀全倡亂佔據永安州即今蒙山昭邑近在比隣影響實大一時土匪蠱起強逼人民拜臺入會謂之歸洪其會名爲三點會蓋取洪字三點旁之義又一說卽濫崽會濫字亦三點旁也會中稱謂名詞多用隱語如稱先生爲牛一擄人爲拉羊團練爲豬官兵爲牛之類凡入會者皆抄成秘本遇同類人互猜白謎以資辨識故匪黨如張羔友羅老母黃桂林莫昌文馬鈴哥陳金剛等迭陷昭城蹂躪全縣幾徧至民國紀元尙有踵其故智以希圖擾亂者茲將民國變亂略紀於后

民國元年廣西宣布獨立後各縣騷然地方官多不安於其位知昭平縣事楊寶琨本一文弱書生當改革之際一任劣紳地痞鼓譟橫行而莫如之何羅帝保本處漏網之巨盜也公然在本城拜會招集一般無賴魚肉鄉民又在雷霹堡等處設卡強收來往商船費用謂之收行水設有體育社通訊處等名目高揭旗幟聲稱各處綠林豪傑不日下山集於縣城無識者多盲從附和之卽參事會會員何某亦利用其說希圖搗亂一日何某帶羅帝保進縣署威嚇楊知縣曰衆弟兄下山需餉銀五千兩應卽照付楊只得儘其所有與之不足諉以親赴馬江收糧補給乃暗携縣印星夜馳馬江交與馬江司巡檢楊思聰權攝縣事間道往梧州通電告變陸都督榮廷派黃自新督帶官軍來縣查辦拏羅帝保及何參昭平縣志

卷八

外紀部 民國紀畧

伍式

廣州市西關洪壽直街大明承印

事員立置典刑併拘其黨羽七人駢首戮之一時土匪均作鳥獸散乃邀公正士紳出而維持地方人心始安秩序亦逐漸恢復惟四鄉土匪蠢動劫掠頻仍賴縣署有警兵八棚足備緝捕之用查從前警餉係按月由省庫支發至民國三年張鳴岐巡按廣西通令各縣警餉一律停給飭由停辦自治經費項下開支不敷則酌提團學各欸如再不敷則就地另籌昭邑自治經費向無着落林知事廷楨遂擬加糧賦以作警餉的欸紳民多有反對吳紳廷柱首先領銜聯名赴省請願未獲邀准又晉京到肅政廳起訴終無結果後值辦理清賦其事遂寢然清賦結束後省局援案於額內撥還警餉九分之一實較他縣爲優至民國六年將縣屬防樂兩區劃歸鍾山糧賦遂割去大半查從前昭邑精華全在防樂兩區

分縣以後昭平地方益形瘠苦矣警餉不敷警兵裁汰歷任或三棚四棚不等甚有止養警兵二棚者以之供傳案差遣尙且不敷更何能緝匪故民九後首匪楊麻子黎癩瘋卜金揚蕭江南卽蕭六等嘯聚於縣屬之黃洞肆行劫掠縣警並不敢過問地方遂糜亂不堪矣十年五月間粵軍入梧州護軍使陳炳焜率水師遁上桂林其部下劉震寰投降粵軍引導粵軍西上六月七日入昭平城縣知事李海恩聞風先遁劉震寰卽委其部下陸皋署縣知事時劉震寰爲廣西第一師師長槍枝祇有數百乃將縣署及水警署商會所存槍械全數繳去招集烏合之衆授以雜色之槍依附粵軍以爲號召陸皋署事未久卽去職再委吳恭先爲縣知事其時沈鴻英亦已反陸投降粵軍粵人嫌其反覆狙擊之沈遂逃湘

昭平縣志

卷八

外紀部 民國紀畧

伍卷

廣州市西關洪壽直街大明承印

其部下鍾鳴階葉青錢葉幹楨等仍帶散軍分紮英家清塘公會樟木林各處民十冬月鍾鳴階糾匪數千出思勤江直襲昭城幸城內尙有留守粵軍數十人槍械犀利跨江截擊鍾鳴階未得渡江卽潰散而退嗣粵軍因內變撤回梁華堂佔據桂林黃洞匪首楊黎蕭卜等俱投梁部被委爲旅長迫脅各處居民從之只森聰一處極力拒絕後匪攻破森聰遂將民房焚燬殆盡十一年春猖獗益甚擄掠男女入黃洞者不下數千人有錢者生無錢者死洞中屍骸枕籍目不忍觀爲百餘年來未有之慘劫而各匪居之坦然在洞口擺賣貨物幾如墟市甚而富商大賈亦與周旋劣監刁衿爭通欵曲足區之北陀財區之馬江被其劫掠財產均過鉅萬縣知事羅家承束手無策而黃洞匪幫遂下山進城駐紮其時惟

石人島一隅號稱乾淨土因團紳黃朝柱辦團忠勇準備與匪抵抗常派練至牛屎洲上下巡梢匪亦畏之不敢犯故各處居民逃難者均以石人島爲桃源是年秋八月沈鴻英奉吳佩孚令以協威將軍自贛竄回招撫舊部逐梁華堂入桂林以楊裕新卽楊麻子爲撫河護商司令節節設卡商民不堪其擾委葉幹楨爲本縣知事濫發廣西軍用票向商家殷戶勒換現洋又加倍征糧以爲軍餉葉幹楨本沈部軍官兼任知事却以搜括民財爲唯一之目的砂子吳姓本邑望族也惡沈部之殘暴不肯輸將葉青錢葉幹楨等遂率衆將吳姓在夏管夏灘各處倉穀强行俵散又霸收其租穀莫敢誰何十二年夏葉幹楨辭職沈部卽委梁材澂署理後復委黃經邦繼任因解餉赴八步途中被豬婆山股匪何其英等劫去沈部追捕甚急各匪遂投沙子向吳應蘭收編因吳應蘭由梧州受馬曉軍委任回里招募綠林故也沈部追至砂子被匪擊退黃經邦遂報告沈鴻英派其統領沈秀廷攜帶大砲來攻砂子其時匪已遠颺吳姓全族均避於金鰲堡中沈開砲轟擊堡牆爲穿吳姓懼甚央求議和除槍械盡繳外仍賠款四萬元急切無款可繳乃變賣田產輾之沈秀廷視爲發財機會又出富羅口勒索大果堡出銀一萬五千元碓頭葛莪三合等村不繳遂將各村民房焚燬殆盡沈部鄒大倫駐馬江勒收米捐被民團驅逐秋九月沈派其團長何海鳴帶隊擄掠馬江墟損失鉅萬葉青錢復將村頭思樂湯水鹿峒勒勾底埔熊埠大塘盤古塘面水寨等村肆行焚掠十三年春沈又委葉芹英爲本縣知事洋人康德牧師在太

字區被土匪陸三角繳拉去勒贖萬元葉芹英無法應付乃派八區攤賠後查封陸匪田產悉數充公撥歸團務總局收租是年照糧額加倍征收外又加特別捐二倍以一半充軍餉一半歸團費關區土豪葉馥垂涎鉅款運動沈部委爲民團團長率其黨羽雷福朝古洪李福等名爲清鄉實則藉以敲詐鄉民所撥團費任意支銷又霸收關區屠捐防務經費菸酒襍捐等項盡飽私囊固無人敢過問也十四年春委劉錫聰接署縣事未及一月遇變逃去時沈榮光卽委吳家駒代理縣篆未幾代理廣西省長張一氣委張其政來接署此時沈鴻英勢力盡失已由桂林逃入湖南其部下或收編或遣散人民始得脫離苦海惟葉馥盤踞關區鞏橋墟專橫如故冬月潘知事寶疆接事後奉富賀鍾昭清鄉總辦王應昭平縣志

卷八

外紀部 民國紀畧

伍伍

廣州市西關洪壽直街大明承印

榆密令誘葉馥及李福在鞏橋擊斃之其黨羽始散計自民十以後兵災匪亂擾攘數年昭邑地方創亦深矣痛亦鉅矣至今父老談及猶爲心悸色變云

後序

昭之有志自明萬曆四十四年邑侯柯公壽愷始至清康熙三十年邑侯楊公變略增輯之昭之修志自清乾隆二十五年邑侯陸公焯始厥後言修言輯代不乏人而卒未就抱殘守缺者已百七八十年誠吾邑憾事也然志大業也所以信今而傳後也非有雄才卓識不足以抒偉論而伸獨斷莫爲之前雖美弗彰莫爲之後雖盛弗繼邑志之所以遲之又久而莫之或修者議歷時而莫決實事待人而後行耳民國十五年夏五月縣長李公樹枏宰治吾邑時也世變遞更地方多故土匪滋擾滿目瘡痍 公下車憮然曰民生敝矣戕匪之由士習靡矣失學之故昭雖岩邑其故家遺俗流風善政猶有存者治理固在人也於是嚴整團防力除盜匪

昭平縣志

卷八

外紀部 後序

伍陸

廣州市西關洪壽甫街大明承印

振興學校儲積義倉馴至有利皆興無弊不除民事而外則以志乘爲一代之典章所在爲一邑之事實所關謂邑苟無志行且不邑知吾昭志乘久缺捐廉爲倡以勸各界仗助政務之餘急急從事於修輯爲之徵文考獻博采旁搜其間分野沿革疆域山川水利城池職官學校賦稅宦蹟人物名勝關隘祠廟兵制藝文金石以及政治之廢興風俗之厚薄民情之同異與夫一方之治而亂亂而治靡不考据精詳釐然各當條分縷晰朗若列眉綱舉目張瞭如指掌以羊續之清標擅龍門之巨製使吾昭將近二百年之廢墜一旦煥然與國運維新嗟乎當此世運遷流之會斯文絕續之交而 公適蒞昭苦心孤詣爲我邑成此不朽之業未始非天之有厚愛於我昭也是書之成我昭之幸皆我 公之賜也 崧不

敏辱承 公召忝與斯役得以昕夕從 公左右知 公之實心
實政其造福於我昭民者功既在於一時其貽惠於我昭邑者業
且垂於奕世名宦之列百十年來當爲 公首屈一指爰爲撮其
始末俾後之君子觀物興感論世知人而爲之永誌不忘焉
民國十七年歲次戊辰 月 副貢生吳壽崧謹跋

昭平縣志

卷八

外紀部 後序

伍柒

廣州市西關洪壽直街大明承印



昭平縣志正誤表

卷一頁行字誤正

五九二三而宜

一七一五一蛟蚊

一九七一八冠寇

二四五一四瑤徭

二四五一九母毋

二四九一四生此字不要

二五一九二三衆象

三六一二二二三有亦

二九圖之一一五五徵微

昭平縣志

卷一 正誤表

壹

廣州市西關洪壽直街大明承印

脫漏添註

卷一頁行字漏處添入

一六六六列字下備

二五一六二二即字下將

卷二頁 行 字 誤 正

一 一三 一八 行此字不要

一 一四 一四 迤 迤

五 二二 一 三此字重不要

二〇 一九 二五 少 小

二四 一五 四 夜 外

二九 二 八 早 早

三一 一七 一六 事 士

四三 一 一 賜 錫

四九 六 一三 了 丫

昭平縣志

卷二卷三正誤表

式

廣州市西關洪壽直街大明承印

脫漏添註

卷二頁 行 字 勛此字下應添二十字

三六 九 一〇 以八百勛撥歸新興初級
小學校經費三百五十勛

卷三頁 行 字 誤 正

一七 一八 五 翟 瞿

二五 七 五 萬 孟

七五 一一 一八 鹽 監

七七 二 三 鹽 監

七九 七 一六 鹽 監

卷四 無誤

卷五 頁 行 字 誤 正

一七五 一六羔 高

五一 一五 一 落 葉

五一 一七 九 了 丫

二二 一七 一 九 究 容

五 五 一四(加)第五獨立旅第二團團長及並定桂軍第二縱隊司令官西南政府軍事委員會少將參議第四集團軍總司令部參軍 詳人物部武功何武

昭平縣志

卷五 卷六 正誤表

參

廣州市西關洪壽直街大明承印

卷六 頁 行 字 誤 正

二五六 一〇 炙 灸

二八一 八 一 棟 棟

三三七 七 小 少

三五 六 一 篋 菹

三五 二〇 二 英 英

三九 一八 一三 鳩 鳩

四五 一四 一三 恕 怒

五〇 九 七 與 興

五〇 一七八 以 已

卷七 頁 行 字 誤 正

二 二〇 一五 俗 裕

三 一四 二一 避 闕

三 二〇 二二 帖 貼

卷八 頁 行 字 誤 正

九 一四 一二 塵 塵

一四 一四 二二 日 日

一五 四 三 令 今

一五 一二 五 查 杳

一五 一二 七 箒 簣

昭平縣志

卷七 卷八 正誤表

肆

廣州市西關洪壽直街大明承印

頁 行 字 誤 正

一六 五 八 箒 簣

一六 六 一〇 屈 窟

一八 一四 一九 箒 簣

二〇 四 一 旃 舫

二五 一六 九 壺 壺

二九 九 一〇 成 我

五一 二〇 一 羔 高